

懷古田舍詩鈔

姚鼐文孫題



懷古田舍詩鈔卷之二十二

漢軍徐榮鐵孫

乙北集下

起乙巳七月二十八日
至八月初六日抵都作

二十八日發南沙河

微雨纔數點輕烟生曉涼水新翻急調山靚逞濃妝殘
夢宵來短前途日漸長今日當宿中山一百二十里計程鄒魯近喜
入聖人鄉

滕縣城外看山作

沙河北來十五里樹裏山城青迤邐人烟未起無處尋

懷古田舍詩鈔卷二十二

無塔亭亭表雲裏是時晨光乍熹微東南羣山如合圍
昂頭乙乙蠶上箔齊足鹿鹿車驂駢峯高正礙日輪上
一抹但見紅霞飛碧浪參差波向背忽點白雲青破碎
天風作勢欲吹來袞袞卻愁平野礙平野茫茫西北寬
烟巒出沒無閒撐天兩髻忽突兀知是秦時鄒繹山
連日山行苦登頓看山稍慰平生願預愁燕趙盡平原
不放吟眸高一寸

滕文公廟

滕國先君誰長雄至今有廟祠文公豐碑落落揭大字

老柏沈沈含古風圖王未成霸已遠史公有言附驥顯
奈何世主輕儒生好臣所教師資鮮君不見原嘗翩翩
又一時揮金下士天下知蘭陵書客窮愁死卻寵雞鳴
尊鐵椎

北沙河

淺淺斜陽灩灩霞西流新水漾平沙秋風吹轉垂陽葉
誤認河陽一縣花

繹山

凜凜風霜厲巖巖氣象分夜來滕縣雨知是繹山雲魯

懷古會詩鈔卷二十二

二

頌荒曾紀秦碑陋漫云降神生亞聖天意在斯文

孟廟

不讀戰國策豈知尊七篇人心甚洪水旭日忽中天合
傳龍門誤傳經趙氏先門墻容仰止松柏鬱蒼然

二十九日發中山

繁星照大野四顧正茫然客子中山發馬鳴思秣燕河
流西去壯風露曉來鮮誰領新秋味居人方早眠
孤日未出海長雲橫抹天碧垂千里湖紅露一痕先作
雨休妨客驚秋又噪蟬徘徊問歧路旅思正悽然

宛州城外追憶蘇賓禹吏部余丙戌計階北上曾
與同行過此也

廿年人事死生分曾向中山話宿醺未必九原能憶此
偶來萬里忽思君鯉魚書遠無從問曩寄暗函蟋蟀聲
酸不忍聞寒月曉星攜手路眼中樓櫓尚連雲

泗水橋

我行入魯國重是聖人居逢人盡恭敬不分賢與愚泗
水餘教澤大橋跨空虛源流逮濂洛桑氏不曾書

頌魯

懷古會詩鈔卷二十一

三

朝發鄒縣北暮宿汶水旁南北百廿里曰維魯之疆所
以稱上國表海非泱泱豈不恃禮樂與周相存亡古來
開國人忠厚勝富強陰謀旣篡弑桐封亦分張可憐養
馬徒易姓而始王豪華不二世笑罵餘千霜君看魯宗
國更憶秦咸陽有廟祀魯公無宮祠始皇因歎遂成詩
聊爲頌魯章

汶上縣懷劉玉坡制府師

汶陽尚書老釣師投卻釣竿來救時鯨波已息氣未靜
綠蓑青笠歸無期前年送公制閩越嚴陵臺下傾金卮

酒酣爲我說往事未說先有饒涎垂蜀山湖水青玻璃
蜀山竊窕多風姿一痕倒影落明鏡與月共鬪新蛾眉
大魚忽躍藻荇破月影山影皆漣漪此時餌香酒初熟
一釣半尺甘如飴有時自棹檣頭艇大網織就于青絲
橫拋不見浪花起圓撒詎有游鱗知得魚沽酒會妻子
曲肱一夢釣天嬉壓頭冠高每自畏懸肘印重今非宜
心縈野趣念空切骨沁

君恩身敢私嗟我珠江侶漁釣亦和天隨漁具詩不歸
豈有家國慮小隱尙乏山林資風塵雞肋竟何味又渡
汶水來京師蜀山何處望不極但見遠樹青離離回頭
榕嶠天萬里因風敬寫長相思

三十日發汶上

破夢聞呼水驅車又下門

聞要并水則起束褰呼下門則上車日常以此爲節

星侵曉大七月此宵存擊柝穿城靜臨流待渡喧北人
常早起露下見雞豚

曉渡汶水

汶流今古自滔滔夜雨新添漲幾篙舟子莫貪涼睡美
行人不是爲遊遨

居人言汶上去泰安一百八十里天晴日上可見
泰山是日微陰東望久之遠山之外似有疑雲
疑霧者未敢信以爲是也作望岱詩

四千丈外影迷離

博聞錄云泰山名
蓬元高四千丈

十八盤多想像時

青遠定將天共色積高甯藉地爲基煩勞望岱同平子
正直瞻衡媿退之差喜龍鍾猶未甚故勞輕靄蔽朝曦

昌黎題嶽寺詩自負正直感通而東坡
嘲之謂天意哀龍鍾故爲下一轉語

泥沙行

南行常苦泥北行常苦沙泥膠車輪沙則否眯眼耳鼻

懷古壽鈔卷二十二

五

露齒牙轆馬低頭服馬蹇一步塵沙蹄一捲車前竟日
雨濛濛車外山川都不辨北沙含笑語南翁塵沙不到
閨房中高堂大厦君不住自要馳驅來此中君不見道
旁日日車如雷塵是南人帶得來又不見車前一步卽
閒地柳淨波涼曲肱睡

舊東阿道中作歌

東平州北沙河寬河清沙硬波漫漫過河便入山溝路
十步艱難九迴顧乍似牽來上水船搖兀經時纔得渡
黃華園北阿井南樹繞雲霾山復山山圍路上路詰屈

路入山腹山連環泥路沮洳石鬼歸縱可齊驅不方軌
赫然守險一夫當倏爾相逢兩車悔愛山入骨我性成
此山奇醜卻堪驚雙乳森森插天半石墻嶄嶄當空橫
人言此是泰山麓來自長城分峻玉山靈搏土良復勞
萬里南來作一局餘砂剩石隨手拋藩屏以來任礪礪
不能爲世作雲雨空與客路增盤坳南天門北天門秦
觀越觀浮朝暎太平頂上一長歎驚起白雲如海翻此
游有志終須遂相期跨馬重陽內躡葛攀藤最上頭十
倍崎嶇吾不悔

懷古會詩鈔卷二十二

六

大爲壁蝨所苦又宿車中

照壁忽驚絕纍纍如貫珠同聲方競奏

隔院琵琶之聲方沸如雨獨

宿亦良圖不有狂司馬何因逼老奴直思重貰酒騶卒
共歌呼

八月初一日發舊縣

離家換萸莢驅馬發山阿道複雷聲壯林稀露氣多驚
塵棲石壁晴影到銀河猶可中宵舞聞雞一浩歌

馬鳴忽驚喜知已出山溝萬里晨光動茫茫野色浮孤
城猶隱樹宿霧半遮樓浩蕩前途濶馳驅得自由

渡延河

曉日人爭渡延河舊有橋輕烟餘一抹飛上斷虹腰黃

石祠堂在魚山梵唄遙君王文采盡覽古發長謠

陳思王墓

在縣西北一十三里

銅城警史歌

東阿歌妓脂粉鮮道字不正嬌可憐銅城警史無顏色

獨仗歌喉作衣食琵琶如雨三絃濤雌呂不如雄律豪

倚門攏撚未終曲白雲不動青天高為君歌君引厄情

多情少看兩眉與郎遇合乃天意燈花喜鵲皆先知

喜上

懷古會詩鈔卷二十二

七

兩眉梢燈花報喜鵲叫皆多情曲中語

為君歌君舉杯套車送郎郎獨歸

妾身不去妾心去化作蝴蝶隨郎飛

套上車曲中語也

留君戀

君君勿惱出門何如在家好君不見槐陰如水空階平

蟬聲嘶唳秋風清北窗跛腳一夢覺茶熟香生絃管鳴

又不見火繖高張日亭午車前馬後塵如雨早尖打罷

晚程催看君又入塵中去

東阿雜詩

不害三歸築上卿女閭三百又何名可憐賺得紅裙死

日抱琵琶穿去聲店行

肯信吾翁卽若翁多情到底是英雄故人誼重臨危見
又把頭顱贈馬童

巍巍聖德大如天成命收回似轉圜誰是東阿誰卽墨

小臣來本自田閒

謂陳頌南

心諾冥冥祇自知延陵寶劍挂松枝後來惟有朱公叔
生死交情更不欺

盛陽

處暑已過白露將初涼稍稍後盛陽連朝汗不減三伏
何日風來吹白楊牡丹重樓桃百葉三五明蟾圓便缺

懷古會詩卷二十二

八

不極不返天道然忍以待之勿復言

雨師

細篩紅粉點瓊砂糝上纖梢作晚霞一穗折來雲氣在
無人知是雨師花

初二日發在平

客子殘宵發呼門過縣城人家都夢裏擁被聽車聲樹
裏揚鞭出泥中認轍行東南氛翳少又喜得朝晴
長天千里遠曠野一燈親儻蕩行吾素馳驅信此身歸
來三徑宅秋興二毛人似有珠江夢搖搖記不真

雜詠

常何應是不尋常敢用游人直諫章今日當言知幾許

無人肯信馬賓王

馬周荏平人

諫君吾愛東方朔養母誰如北郭騷知已王公一夔足

感恩平仲亦人豪

穿

去聲

店琵琶手自攜櫻桃芍藥調淒迷不歌鄭衛歌周

召欲起綿駒再變齊

鳴石山

維晉有田宣隱居鳴石山山靜石自響鐘磬非人閒乍

懷古金鑑卷二十二

九

見明月夜編衣時往還疑是古之仙游戲來塵寰拊石
以候之倏忽果來集自言周宣時學道居少室王姓名
中倫丹成服金液執袂求道要諦視骨尚清撥以白石
子乃是日月精舍之不饑渴久久當長生此語非無稽
聞之段柯古見酉陽雜俎我行過高唐問山了無覩山風吹
野微涼生雲際如聞笑語聲名山不遠在咫尺碌碌何
事方長征覩亦不暇游游亦不必遇巖前雲月儘留君
馬後車塵勸君去

魯蓮村在荏平

一箭下燕城一言還卻秦成功不受賞從古更何人夫
子如明月無心照海濱卻憐留鄴輩謂留侯受爵便稱
臣

擬由鄭家口西行訪籍毅庵於藁城聞兒村水阻

不果

袞袞渟沱入夢來故人消息碧雲隈月中楊柳同誰詠
酒畔芙蓉待我開繞道祇須三百里相思何止一千回
兒村便是銀河水隔著紅墻儘費猜

初三日發腰站

懷古會詩鈔卷二十二

十

萬里冥濛一色青林梢依約見疎星秋陰獨向宵中看
豔曲誰能客裏聽隔院琵琶聲未歇沙路燈寒鈴自語茅檐被

暖戶深局生憎轅下蕭蕭馬不放征輪片刻停

秋陰曲

不雨不成秋旣雨行恐泥斟酌晴雨閒秋陰見天意昨
夜長雲如墨濃涼蟬聲裏秋溶溶卻愁縱有風千里政
恐難移山萬重朝來海日窺規遍鱗甲遮藏難露面將
車喚起六龍來爪破殷紅纜一縷貝州城頭乾鵲鳴太
平驛口柳風清垂雲欲下條自散作輕烟媚午晴晴

雨茫茫誰料得平野寒帷看秋色夕陽依約閃西疇忽
放蘆花數星白

劉智廟

公明天下士心折劉潁川謂嘗與之語昏夜不暇眠夫
子誠盛德清芬振當時民到于今稱何以能得之我來
問明禋曰廟實無有地以其人傳卽此名不朽魯連臺
陸賈城李白酒樓長不傾何須更改陽城驛翻令賢人
埋姓名

初四日發劉智廟

懷高齋詩卷二十二

十一

空說披星出無星祇有雲近人天似夢望火路纔分廓
落誠傷獨馳驅敢厭勤廣川欣在眼孤塔破朝昕

灌瓜鋪

未成疎雨洗浮埃萬里天容蕩蕩開賴有涼風吹暑去

不妨晴日破雲來灌瓜鋪口秋痕淡

鋪在阜城縣北十里過此卽交河縣

界案新序灌瓜乃梁楚界上事此蓋取其名耳

撲棗鄰西晚景催一心頭忽

根觸東南今日要邊才

太瘦生行

我生窮阨乃自取食能不肥藁不苦磨成鐵骨看擔當

稍稍馳驅何足數旁人問我太瘦生聞之自負頗不平
筋疲肉痛初隱忍把鏡虛堂纔自驚頃發齊郊宿燕郭
下車困臥呼難覺覺來但坐不欲行從今未敢矜腰腳
自憐卻憶少壯時捷如俊鶻初登枝陰平夜雪凍三尺
扛軸掀輪猶戲嬉十年前捧檄起漢陽保陽路邇迤
獨輪車窄不能乘徒步從容二千里自從作令來澗中
肩輿閉置成癡聾祇今年纔五十四行步紆徐如老翁
君不見黃梅墜腰石土行日運甕荀卿垂老尚擔簦劉
實還家常杖策主張富貴要神明消磨患難須筋力噫
吁嘻人生少壯老至衰一衰之外事可知我今未老已
先瘦時縱可爲還自疑四方政有驅車願千里空吟伏
櫪詩

碌碌行

碌碌復碌碌三十輻共一轂以其入蹄代兩足朝亦碌

碌暮亦碌碌一解碌碌伊何行路大難饑耶渴耶塵漫

漫厥餅鳴牙飯溼而粥乾吁嗟乎我與僕夫均此餐二

解有葦者席其塵洋洋有稊者稽壁蝨所藏竟夜不得

瞑起而徬徨吁嗟乎我與僕夫均此牀三解君不見馬

前後車四帷如林之僕纓綬綬行廚絡繹來如飛人生
富貴須何爲自取窮途當怨誰 四解

李攜琴歌

北方有佳人自言李攜琴問年始十四能爲鸞鳳音入
門含笑歌一曲隔窗聽者人如林秋星灑灑秋燈涼初
歌尋鍼後敢耶楊柳青蔥動閨思連環宛轉斷人腸時
時歌到驚心字有情無情更增媚教成一瞥眼波飛未
解飛波是何意曲罷忽拋銀甲嬉高談朗笑不能癡看
成北地胭脂俠未是江南旖旎枝墮溷飄茵誰爲設老

懷古詩鈔卷二十一

七

子瘦心難向說試教唱出五更來句句傷心都有血雄
蜂雌蝶戀繁華幾日摧殘孌娜花念取月明三五夜莫
教流落久天涯 蜂蝶月明皆
五更曲中語

夢熊笛江廣文同年醒而作歌

十三年來數 上聲 風雨夢裏相逢知幾許富莊驛畔作新

秋萬里追尋吾與汝譚侯 玉生
孝廉 讀書秋樹根我約抱琴

同訪君君知我到乃先過一笑驚破珠江雲苦道年時

人事改桑田眼看成滄海金門高避世難荔枝浪遠

成言在 曩約買田
荔枝浪中 問余六載苦從戎路鬼椰揄劉伯龍

頭銜雖換祗畫餅功業未成今老翁別後羅浮曾到否
每念蘿岡一回首明月梅花儻憶余鑿井耕田亦何有
話久宣爐漸換香秋風吹雨正浪浪捶琴一和對牀句
人閒無此真宮商櫪馬長嘶驚繾綣門外三更初放點
忽悟蕉窗聽雨時正是茅簷柝聲轉作詩寄君長歎吁
人事悠悠萍梗如相思一夢尙難得況說名山同卜居
初五日發富莊驛

占晴先問屋東頭雲淡星疎破旅愁大野平看天影直
中田靜覺露香稠懷人風雨成詩易去國年華似水流
懷古會詩鈔卷二十二

古

珠每年時詩酒地宵來知否一般秋

河閒懷紀文達公

賢王自昔傳經地應有通才蹈某軻今古源流七畧備
鬼神情狀一車多四庫書提要大半出公手所著閱微草堂筆記五種多言鬼神之事
博觀正有眼如月善諠無妨口似河生晚自憐迷學
海瓣香私淑問如何

河閒雜詠

蕎麥花邊見蓼花分明白雪映紅霞城中七月無花看
那識秋原物色奢

兩字嘉名尙得傳
河流故道已茫然
只餘一勺城濠水
又被窮黎占作田

種秫高田穗已成
祗留四葉護尖生
畫家便是倪迂法
一帶平林夕照橫

齊郊稼穡已登場
燕趙離離尙待霜
留與行人看秋色
秫紅豆紫粟頭黃

憶包孝肅公軼事偶作

舊聞包老面一笑
比河清忽豁瀛洲負
公錢十萬贏

宋史本傳知瀛州諸州以公錢貿易積歲所負十餘萬悉奏除之
溫原從肅出義以輔仁

懷古詩鈔卷二十二

五

行太息熙寧際三司市易成

初六日發河開府二十里鋪憶壁閒詩不置

壞墻親拂隔年塵
意外相逢眼爲新
老子平生無此句

江湖沿路訪斯人
袁簡齋句迷離入夢猶詩境
慙碌驅車又

旅塵日日風沙星
露裏與君一樣歎勞薪

附錄拜夢生題壁詩
暮烟茆店駐征車
滾滾驚埃日

易斜詩壁拂塵鈔
賸草歌錢隨例乞
閒花客愁入夜

常依枕短夢驚寒
未到家苦被雙羸
催促去又披星

露踏風沙

石門

秋風吹大野客子喜還驚遠道增涼思長雲擬曉晴捐
留紈扇好添怯夾衣輕行過晨門去無人問姓名

香城

任邱北
十里

魚君陂水綠茫茫
疏隴風來曉露香
行過香城看初日
阿陵城影接天長

瓜廬

種得秋瓜幾百頭
秋來支木作看樓
密編葦箔柴車大
遠泊蘆磯釣艇浮
黃月摘來圓箇箇
紅冰賣罷晚飈颺
中田記得幽風句
卻被人猜是故侯

懷古詩鈔卷二十二

去

書所見

子婦同車挽獨輪
野田拾穗自欣欣
樹陰睡著蒼髯客
恐是萊蕪范史雲

趙北口

南來袞袞厭風塵
看到烟波眼界新
五濟河寬船步靜
易京城古戰場湮涼無

御柳垂朱檻

相傳
南巡時水獵於此

仁廟

秋有官荷伴紫鱗
避世

肯容來卜築
便同漁父理絲緝

十二連橋作

馬蹄蹀躞驚埃捲拂面西風旗腳轉吹過燕南十二橋
高柳斜陽紅荏苒柳岸橫波漾落霞茫茫殘葦界平沙
五湖別有魚蝦國八月猶開菡萏花我頃來從山水窟
風景依稀爲君說西湖減半占春風揚州一倍看明月

西湖六橋揚州廿四橋也

人言北地足風塵百頃淪漣亦可人清水

西來從保定大桅東下達天津當時常笑公孫泣鼓角
梯衝紛告急若教避世侶漁翁縱有庾冰無處覓往事
悠悠孰短長烟波渺渺閱興亡五橋關北林陰合酒美
魚肥尋醉鄉

懷古會詩卷二十二

七

十二橋再作一首

見蔣半坡題壁詩云平橋飛跨水當中十二欄
杆一色紅行到柳陰齊駐馬四邊消受藕花風
聲情景色皆臻自然道天籟也愛不去心聊復
擬之不啻上下牀矣

廿四欄杆十二橋芙蓉楊柳路迢迢斜陽照見游魚返
知是天津上晚潮

初七日發雄縣

夜來疎雨乍沈瀾一變新涼作薄寒漸到天邊知日近
回看橋外識星乾舊游無夢歸南武前夜夢新路隨人
指固安記得豐臺看花處十三村影碧漫漫

次前韻

曉日疎陰漾碧瀾蟬聲苦訴夜來寒天長坐看朝霞散
野迴行來宿雨乾雲外山奇嫌樹阻河邊沙軟覺車安
璫霄有路終須到不似蓬萊路渺漫

弓匠營早尖作

案宋史和詵知雒州在雒十年能
偵敵上制勝強遠弓式能破堅於
三百步外邊人號爲鳳凰弓今營去
雒縣五十里疑卽當時造弓之處

懷古會詩卷二十二

六

落木蕭蕭弓匠營鳳凰弓出九邊驚勸君妙選三千弩
不射天狼射海鯨

樂事

收成樂事讓茅檐秫豆縣麻黍粟兼車上捆回秋色飽
場中吹過午香甜翻餘葉地人牛暇賽到豚蹄婦子霑
肯信路旁車馬客欲將手版換腰簾

行裝

早御重繻午葛衣客途寒煖費支持行裝止有行人覺
闔閣遙猜那得知

初八日發固安

北闕雲光麗東溟曉色清坐從星影裏看到日華明畿
縣驅車出渾河策馬行從今安穩睡不復聽雞聲

黃村早尖作

黃村飯罷倚車眠起坐車轅看午妍樹杪雲橫排卦畫
松間風入學琴絃紅爭殘暑秋來日黃訴行人潦後田
冊里南西門外路蟬聲如雨和吟鞭

入都

鬱蔥佳氣繞金臺三十年間六度來

嘉慶甲戌丁丑道光乙酉乙未丙申

懷高會詩鈔卷二十二

九

及今乙巳凡六度

山色照天雲樹在夢痕如水鬢華催君廚俊

及知交感舟楫鹽梅經濟才會見黃河瞻泰岱明朝青
眼為誰開

名玷山公啟事中此軍誰忍更言功

劉玉坡制府師明保云司理軍需甚

屬認真雖積勞成疾猶復晝夜不輟梁楚香中丞保陞云總理一切軍需諸事擢節臣軀恨不心

肝奉

國計真愁杼柚空宣室鬼神非實政議曹教誠豈愚忠

謂龔遂

聖朝倘欲知民隱不學寒蟬禁北風

終古西山爽氣多
勞勞人海幾人過
秋霞不散瓊華島
夜雨平添

太液波水學琴心
猶我待檜連雲頂
問誰摩使君應有

重游興蠟屐相從意若何

謂陸子
範太守

年年聽鼓曳長裾
翻羨征人得自如
三十日中山水癖

四千里外醉吟餘

三十日中得詩
一百六十五首

西湖南海分歸夢

時寄

家兩處

北樹東雲盼遠書
一事平安先報慰
風波雨雪不

關渠

懷古田舍詩鈔卷之二十二終

懷古田舍詩鈔卷之二十二

三

懷古田舍詩鈔卷之二十三

漢軍徐榮鐵孫

乙南集上

起乙巳八月在京師九月十二日出都至三十日抵清江作

八月二十七日蒙

恩召對恭紀

三點傳鐘啟禁門九關虎豹已雲屯觚稜遠界虹蜺影

宮樹先承雨露恩黃匣呈名齊候起

傳一人謂之一起

羽琫勒

萃早傳飧

御前侍衛衛每日黎明俱

乾清門侍賞祭肉

殷勤故舊來

相慰都說

懷古田舍詩鈔卷二十三

天顏笑語溫

三策衰然偶擅場重承

天語惜文章無雙誰競秘書省四十真慚著作郎博士

生涯原許耐拍張家世不應忘牛羊芻牧須人任一落

塵埃歲月長

戎釁傳來珠海東蛟門烽火照天紅鯨鯢有恨遺京觀

霹靂無情誤火攻漢代樓船邊備急

虞階干羽

聖謨崇三年籌筆嗟何補蒿目東南杼柚空

絕島星羅海百尋窮檐生理半人禽民無衣食

宸衷切邊有藩離

睿慮深五事

錫疇懸象魏

忠孝勤儉讓

片言比事愧棠陰

小臣

敢負平生

學親奉

絲綸凜自今

九月十二日出都

人海藏身一葉輕
栖遲兩見月輪明
傾心祗自依

丹陛抵掌誰能取
上卿橘柚秋風游
子夢

夜夢

粵中桃花深

懷古詩鈔卷二十三

二

水故人情

謂韓雲卿羅羅村章蓋臣

鳳城未有重來分
飽看西山落日橫

日橫

十三日固安道中

紛紛落葉打車篷
吹破秋陰西北風
拒馬河渾遼水急

試鷹天迴塞雲空
回頭山色居庸遠
到眼輿圖督亢雄

固安有督亢亭

訪古自憐都未暇
打包來往只怱怱

十四日新城道中

高粱收盡種低糧
一雨秋田麥已秧
羊燒

借去聲

牛澆渾

不管只憑臘雪替埋藏

千林寒翠接雲高
垂柳年年送客勞
愁煞饑鴉來噪晚
一聲一葉下亭臬

平原十里便連天
不是行人目力懸
枯盡青青千里草
請君來證地員篇

雄縣懷宋李垂範刺史 允則

不見浮圖百尺高
猶思荷菱宴城濠
榆林蔬圃皆行陣
胡馬羶車敢遁逃
逃事過巖疆非往制
時艱今日要人豪
無端懷古增惆悵
極目東南首重搔

十五日發雄縣

懷古會詩鈔卷二十三

三

離家三見月輪懸
恰是三秋風露鮮
錫水金臺縈夢轂
燕南趙北逐吟鞭
光涵漁艇雙宿影
漾虹橋六六連
不是路旁名利客
誰能看到五更圓

任邱道中

莽莽平原落照中
天將秋色濟詩窮
寒蘆似我頭先白
官柳依人腹半空
掘鯉泉湮非舊淀
寰宇記淀在任邱
即魏都賦掘鯉之
淀蓋節之淵
也案淀今湮
盤鵬天遠正西風
易京城闕無樓櫓
堪笑

公孫井底雄 易京城在河間今毀公孫
瓚所謂百樓不攻者也

河間二十里鋪

東海當時乞活城乞錢傳得舊家生至今廿里河間鋪
處處三絃度曲聲

去聲
晉東海公司馬騰掠塞外生口萬人築城河間居之聽自乞活號乞

十六日發河間二十里鋪

旅程不敢安初夜發村店同行非夙約齊驅雜貴賤長
林一蔽虧疎燈遞隱現鈴聲曳殘夢客路聽已倦烟城
屯遠山月野輝素練南風盪微雨陰晴倏屢變人間正
酣眠清景無由見

過河間府

懷古會詩鈔卷二十三

四

巖城截業湧高空終古瀛洲地勢雄河道尙依蒙氏壘
秦蒙恬策馬領

城以禦滹沱日華曾照漢王宮半林雨細纔驚鳥九

月霜輕未度鴻吟過高陽臺畔路碧天如海夜濛濛

蘆花

來見寒蘆紫穗抽歸途秋雪照人稠蘆花不及行人健
一月光陰已白頭

十七日發富莊驛途中大風至慢河雨

西風捲地送征篷夢裏伸肩盼曉紅人事轉移爭頃刻
東南吹雨忽濛濛

高臺見說有華陽

在阜城縣相傳
叔夜授廣陵散處

千載遺蹤近香花

不用師傳廣陵散
天風海水正琅琅

富莊驅馬慢河來
僕谷車鈴睡眼開
六十里尖行已到

曉雞纔報第三回

喧喧茅店駐征輪
矮屋如舟慙
毳身賴有漁樵與爭席

年來差喜得同塵

景州道中

弓高城北路冥濛
曉色吹開眼界空
灑道不妨雞口雨

俗謂天將明雨為雞口
雨此時有雨是日必晴

阻車真怯馬頭風
名場身世勞

懷古會詩鈔卷二十三

五

推轂客路生涯類
轉蓬剩有蘭臺五色筆
猶能為賦大

王雄

景州

茫茫大野見孤城
湧出浮圖十二層
倒劃歸雲分曉日

高迴寒雁俯秋鷹
時清祗作莊嚴供
事急應同斥堠登

細柳舊營何處是
欲攀危級怯凌兢

劉智社書元呂思誠事

一過王青飲亡羊
忽自驚使君真
豈弟兄弟本同生
世

俗誰云薄躬行
要在誠鷹鷂與鸞
鳳擇術貴分明

十八日劉智廟束裘登車假寐聞雨至曉方行
臥聞浙瀝打篷聲萬里還鄉夢忽驚雲意黯愁劉智社
月華明憶趙佗城馬嘶似怯風猶怒鴉訴眞憂雪欲成
不是宵行仍露宿獨聽寒雨到天明

老去

雨泥晴土路漫漫河急風高天正寒性命相依轅下馬
塵埃同食店中餐平生愛著遠游履老去漸愁行路難
歌笑向來輕一室不知清福是平安

野興

懷古田舍詩鈔卷二十三

六

望遠征途怯吟秋野興長晚棉花尚白老樹葉先黃日
薄難烘雨雲稠待護霜不知沙磧雁早晚到衡陽

薄暮微雪趨恩縣

風晴雲更合淡墨寫平臬暮色依林樹新寒入縵袍不
妨藍嶺雪休報綠林豪恃有蠻夷長中原運六韜

同行有新

遼龍川
令者

行李雙龍劍驅車五馬驄

新買夷刀僱車五套故云

人從嘲宦拙吾

未悔途窮曠野親燈火遙程待僕僮

僕凌全由藁城期今日會於腰站

貝州望不極只在冷雲中

雪晴復行三十里至腰站已中夜矣

欲試書生膽前程正戒途同行如患難迴薄遞招呼漸
聽雞聲起猶瞻馬首趨中宵須起舞渾不憶饑飮

十九日發腰站

破夢聞人語宵來月在天霜痕初試五晴影忽迎鞭鵲

爲行人喜車纜遠道聯僕凌全始自藁城來會平原山路近臨發

重流連腰站屬平原縣東行卽入泰山山路僕夫怯不果行

得藁城書

故人珍重寄雲藍往事今情語再三雲樹也同思渭北

懷古詩鈔卷二十三

七

琴尊忽似到滹南嵇康駕欲尋千里逸少書曾報五男

籍毅庵疑來腰站會子事不果行毅庵笠樵書來並言年來生子女余先與書言五男二女婿嫁已半也見

說宮墻仍舊觀年來一事最懷慚新修大成殿已竣工矣

喜晴擬白沙體

奈過連陰客運通長途歌笑往還同照來秦氏登樓日

吹到東坡送客風樂府日出東南隅照我秦氏樓東坡詩送客今朝西北風啼樹饑

烏緘大背滾塵倦馬振長鬣麥田已茁菘畦綠甞爲行

人也自公

聞雁

已誤重陽十日程遲遲爲要帶霜行昨夜始霜高唐路上長
征客聽得南來第一聲

自高唐抵荏平

訪古吟秋客思閒馬頭長路任彎環河經鳴犢曾歌水
遂入重邱始見山黃葉影中飛鳥亂白楊聲裏暮鴉還
解鞍欹枕吾何有壞壁尋詩一破顏

二十日發荏平

又喜晴光動三星高在天齊帮官令肅趨隊客程喧宿
雨猶鳴轍新霜已折綿曹騰理餘夢淒凜不成眠

霜華

懷古詩鈔卷二十三

八

四野霜華作曉寒日光烘起白漫漫銅城驛外浮銀海
湧出東阿百里山

望泰山

目力知能到幾重馬頭驚看碧芙蓉天門南下陰陽判
遼海東來造化鍾四顧且吟青玉案千秋猶見白雲封
天公定解憐腰腳夜賜仙人九節筇

舊縣道中

行過重陽十日中秋容寂寞野田空東阿舊縣山溝畔

初見黃花第一叢

山溝山石亂離離折軸掀轅苦不支若向遺山論絕句

賞心宵作女郎詩

祥雲曲

絃語隨人抑復揚高雲不動露華涼尋常一樣鮮花調
唱出珠喉便有香

脉脉秋心寄眼波呼將明月照清歌向來不解桓生癖
今日真須喚奈何

一抱琵琶已擅場縱無國色有天香鬱輪袍肯王門奏

懷古詩鈔卷二十三

九

便取龍頭也不妨

商家林有題店壁者自署女郎尚書榜列江南山東直隸歌鬟二十二人

第一名玉如清江人年十六歲第二名祥雲東阿縣人年十六歲第三名秀琴獻縣人年十七歲

二十一日發舊縣

萬五霜華白中天月影斜棧芻猶戀馬官礮已催車

齊郡三礮放行

攪夢鄰歌豔縈心客路賒山溝十五里坎塹似

生涯

舊縣道中

中夜發山溝魚貫結行隊篷車劇舴艋掀簸石浪內擁
衾不成臥有夢皆破碎前輪一以阻維谷占遂退是時

過哀鴻村犬驚忽吠零風盪霜華殘月乍明昧回頭望
燈火絃管鼎猶沸居行或異地歌哭豈殊類人從憂患
生念言發深慨

東平尖

小店橋南舊有名夾河高柳午窗晴重來未改清陰在
只欠涼蟬一串聲

汶上道中

路入齊南物色新寒原經雨少征塵鬼廷老柏髡留頂
官道垂楊臥長鱗天氣漸高雲減色農功已畢野無人

懷古堂詩鈔卷二十三

十一

勞勞只有長征客飽看秋光暮復晨

渡汶水

南下先愁渡東來已出山暮青遙送馬秋淥淨當關雨
漲來曾過波分去不還臨流思白老援手濟時艱

謂汶上老

人白
黃

二十二日雨發汶上

勞勞行李發中都黯黯愁雲夜未徂寒預告人羣雁到
昏纔照馬一燈孤重陽已過猶風雨老景侵尋况道途
喜是吟身猶健在泥中牛馬任人呼

曉行汶上道中

疏雨灑殘夢，閉置車帷中。鴉啼始覺曉，窺戶烟濛濛。初
黃柳未落，出沐晞長風。有如春始梯，誰謂秋已終。問路
繞遠村，蹋地看青菘。美哉汶陽田，麥苗已芄芄。吾師老
制府，本亦田舍翁。一朝巾扇起，萬里梯航通。歸林倘有
約，負耒當相從。

高吳橋尖聽蕭文方度曲

樽酒相逢感恨多，中年絲竹奈君何。綠槐庭院秋陰裏，
腸斷蕭孃一曲歌。

懷古會詩鈔卷二十三

十二

兗州道中苦淨戲占

千里秋陰百里開

出都十日惟十日暢晴耳

長途晴雨費疑猜。塵

沙浩劫今知免，卻到泥犁路上來。

風塵

風塵忽已上，須眉禁得霜華幾。日吹心裏松筠空，有恃

眼中蒲柳竟先衰。衣更莫誤歸家犬。

楊希素衣而出，繼衣而返，其狗不知。

迎而吠之，見列子說符篇。

泥沒真慚曳尾龜，江海馳驅還自笑。白頭

可稱把旌麾。

二十三日發兗州

萬柳擁高城一道漏斜月風鈴引殘夢清景記恍惚疎

燈儂清曉人語出深樾時聞悲笳聲閱伍齊步伐是日充鎮

迎霜褰帷望鄒繹高翠湧天末我馬元以黃胡能坐超越

零雨念昨宵旭日喜明發人事有轉移天意哀白髮悠

悠指中山庶幾免顛蹶

中山早尖聞前路泥雨難行

傳餐不敢逸驅車發中山側聞界河雨竟日流潺潺雨

打車篷溼猶可雨後晴泥深沒輓白馬鐵驪好看客黃

鵠老翁愁煞我北沙河北沙場寬草枯沙硬輪聲乾南

懷古會詩鈔卷二十三

十一

來到此開笑口北下愁眉先已攢世事無常聊信步何

須戚戚憂前路界河未到且長歌一鞭坦蕩行吾素

途中詠物

珍重南來飢座香北黎乞與動盈筐張家大谷無人問

別有鴉兒出擅場

脆棗爭呼挂臘紅牟尼串上映玲瓏定知不是如瓜種

鑽核徒勞學阿戎

排門織席復編牀密五疎籬矮矮墻飯熟酒香柴火足

世間無物比高粱貧人門戶墻五床席酒飯柴薪無一不以秣爲之

老翠搖風卽有香淡巴菰葉映斜陽縱妨田地無多在
猶勝天台種米囊

自夏家鋪趨界河

老轍深盈尺燈昏淡不分耕泥初井陷鬪石忽雷聞夜
已勞雞警危須策馬勲饑疲曾未悔卽此習吾勤

二十四日發界河

鄒滕分界處

到店已中夜僕馬痛以瘖一睡不能覺晨光起東隅避
逅得鄉里結束相招呼

謂二姚君番禹人

喜晴昞日出避水尋

途紆連軫指遠村人烟半模糊樹浮白霧海雲綴青山

懷古田會詩鈔卷二十三

三

圓霜鷹試俊眼秋原草始枯盤馬逞雕弓正宜邀酒徒
旁人笑問我胡爲在泥塗

憶慮善杭州

冬去春來歲月頻爲余辛苦試風塵四千里外肯徒步
三十年來知食貧老子生涯眞畫餅阿奴門戶亦勞薪
粵南燕北天涯裏日數征鴻昞錦鱗

南沙河

凌晨理柔轡亭午解征鞍倦馬嘶風喜勞人抱影安經
旬抵休沐前路正艱難百里陰平道年時七野盤

寒燈

還鄉未辦買山錢
客路空爭祖逖鞭
投筆功名嗟晚晚
著書歲月悔遷延
愁中對酒花無賴
夢裏思家月屢圓
爲報左思嬌女道
寒燈千里伴孤眠

次女遂茶四歲時指謂燈伴子宿嘗

喜其語有詩意

二十五日發南沙河

總轡指官橋一睡三十里
篷窗漏朝日拭眼忽驚喜
臨城問前路天末殊邈迤
秋山引遙矚正墮空濛裏
茅舍起茶烟過客偶停趾
曉市趁行車大小足生理
屈莊隱

懷古會詩鈔卷二十三

十四

疎林有碑製倣詭寒苔蝕玉箸
野火幸未燬紆途不暇訪書此志吾鄙

官橋南五里屈家莊有古碑二篆書奇詭來時繞道曾見之

沙溝營

慢行十八里沙路接臨城

臨城抵陰平五十四里諺云慢十八謂冀家湖以北也不緊

不慢十八謂陰平以北也細碾雙輪響如聽白雨聲

草枯誰縱獵柳細合開營前路徘徊久歧途誤此生

沙溝

厥南分路一抵韓莊一抵陰平

二疏故里

在沙溝厥

寄慮同傳明四子

急流患難多勇退誠不易二疏出東都祖餞傾朝市功

成名遂歸天道本如是賜金娛親舊不爲子孫累定知
著庭誥曾聞答賓戲愚財益其過賢富損其智吾豈老
憊哉遺安乃素志翳我佩此言過里起遐思書以寄汝
曹庶知老人意

過匡衡故里

沙溝南

河間纔過毛精壘

大毛公豕土人謂之毛精壘

嶧縣還逢匡鼎鄉五

十學詩應不晚欲宗周漢廢齊梁

陰平口號

沙河南路趨陰平百二十里爲一程車行兩頭不見日

懷古詩鈔卷二十三

五

避泥阻水可憐生

二十六日發陰平

林宗憇逆旅躬自爲汛掃我嘗師此意遠井不瀉草菅
來投宿遲荒店溷芻橐呼僮理雜穢倦枕得一倒關心
問晨星殘月出已早僕夫催束裝客子愁就道出門逢
遠山秋色方靜好高林擁烟霧一碧淨如澡不憂路漫
漫且吟日杲杲

嶧縣道中

馬頭飛出曉霞光睡眠初開望渺茫霧湧遙山如隔海

風搖疎樹卽連檣碾渦左右搖詩夢鈴語分明笑客裘
書劍無多纔手置請君廓落看車箱

都中買刀一柄書一篋

張莊道中

江南南下路百里指邊塘

今日當宿邊塘亦曰汴塘塘北山東嶧縣屬塘東江南銅

山縣屬塘西江南邳州屬北至陰平百里實七十里也

土賦連雲黑林疏照水黃

膠輪行軸重擺渡客程妨極望烟檣遠遙遙天一方

張莊渡

見說張莊水滔天六月來居民半魚鱉屋宇此蒿萊便

恐支祈逸

水自微山湖出韓莊東下

應憐鴻雁哀何時無俊傑拔劍

憶澹臺

二十七日發汴塘

汴塘金雞渡出店纔五里行人爭渡先未曉皆早起月
鈎挂疏林燈暈盪寒水南轡已紛紜北轅亦戾止人馬
險同船木石滑溜趾旣濟瞻未來後轍方邐迤中宵犯
霧露不歎垂暮齒勞逸隨所遭習勤亦良美古來百歲
翁不盡安居子

曹八集早尖

十里垂楊一徑通吹開寒翠漏晴紅想當伏暑三庚日

喝透涼蟬萬翼風馬望午烟前路喜人趨亥市此鄉雄
析圭擔爵知何用千畝封君勝渭中

主此集者曹孝廉
土人云集南北四

十里內皆
其地也

車中雜詠

任重軸恒樸推行輪則圓豈宜安四角慎勿鑿方穿
作事欲欺人動謂後人拙君看大野中車行必留轍
驂駢自騰躍轅馬只低頭良驥稱其德長途慎所求
篷搖一舟小塵起驚浪蹙平地君勿輕有時亦顛覆
蓋軫象天地日月卽兩輪日月尚不息輾轉余何論

懷古會詩鈔卷二十三

七

下邳道中

近看仍疏遠望稠一天新綠麥芽抽誰憐耐過冰霜日
別待人間四月秋

遠樹平沙極望閒弓弓百里路彎環遙青一掬迎人立

知是邳州半角山

葛嶧山俗
呼半角山

二十八日發舊邳州

宵來西北陰侵曉東南暗龍尾雖晶瑩鳥味殊黯淡連
韌趨河隄呼火度石礪坐見雲影流漸覺天色紺殘月
隱如星吐曜時復暫我程餘幾日已繫清浦纜先晴荷

天慈後雨敢余憾浩蕩聞河流風勢方泛濫驚疑屢褰
帷東方再三瞰

車行看日出作

夜氣茫茫連曉霧秋陰黯黯愁長路六龍總轡忽飛來
萬里長雲遮不住初看勾漏浴丹砂漸曳金繩一道斜
日腳雲頭忽相值烘作扶桑千頃霞西爪東鱗爭激射
眞面時時露雲罅流出江萍散不收鑄成秋橘高無價
君不見羅浮高高子日亭此時襍被誰曾經又不見秦
山日觀俯滄海餐霞被羽何人在家山客路兩蹉跎歷
碌風塵自嘯歌帝憫窮途無鐵杖天教俗眼洗金波

宿北

宿北長隄如半環河流不到今幾年淤沙百頃宜豆麥
天惠窮黎供粥餽淤田種出無租賦隄外耕田隄裏住
今年秋好十分收苦草泥墻看處處春桃柳花秋菊暉
亦有菱蘆魚鱉肥男婚女嫁不咫尺一飽之餘無是非
君不見縣南大溜從南轉晝夜兵夫輪守險有田不暇
事春耕羨汝安眠養雞犬

車路口渡運河未至順河八里

南來幾千里三渡運河中德州待曉日湖漕已回空昨
行張莊壩始見來蘇松今日車路口回艘皆未逢乃知
車道直河流彎幾重正如作弗字我弩而彼弓永字八
法側勒
弩趕策掠啄
礫弩謂一也
嗟彼太倉粟久聞石一鍾翳余亦盜食礫
碌慚無功誰能出奇謀一濟輸輓窮

二十九日發順河

驅車發順河迴瞻宿遷城中宵闕燈火夜聽河流聲長
隄歲百萬亦以資旅程跬步皆

君恩吁嗟感余生悠悠指東南曙色忽已萌幾月迎馬

懷古會詩鈔卷二十三

九

首夜氣爲之清茫茫四野靜隱隱聞雞鳴人家辨疎樹
漸有行人行極望楊花集傳餐怡旅情

楊花集早尖

本名仰化
余戲改之

小集人烟近百家垂楊垂柳抱隄斜從今改作楊花好
飛絮纏綿絆客車

黃河隄上大風

萬里披襟也自雄河隄高處看晴空飛來西北通天水
捲到東南刮地風馬耳頻聽雙削竹客懷多感一飛蓬
四方有守尋常事去垢何因入夢中

宿衆興集

千山行李鬢毛蒼終日輪蹄爲底忙鏡影不曾饒老子
鈴聲猶似笑三郎跨轅睡僕時侵界入店行人早占房
三十年前野盤處重來安枕陋何妨

嘉慶十九年冬大
雨雪至此行不及

店五里露
宿於野

三十日發衆興

總轡趨王營輪聲一何喜星霜十九日風塵二千里卸
裘約亭午同隊競先起隄平沙路乾風恬睡味美伸腰
問星飯魚溝已尺咫是時月之晦殘魄應盡死分明一

懷古會詩鈔卷二十三

三

鈞金乃在朝霞裏明晨曉夢酣曹騰墮烟水清景戀今
朝前轅久徙倚

晦日看月作

平生始見月盡月朝映朝霞滄海東銀甲招殘紅錯落
金船穿過碧玲瓏先驅已近將升日絳帳全遮忽有風
自是向來無獨醒奇觀原只在當空

魚溝

魚溝飯罷趁朝晴歷轆長途賦遠征東越迢迢况南粵
且停征轡問王營

落花生

姓名何必列羣芳
風味如君淡不妨
肯與落花徒委地
居然生子即離鄉
三層樓上人如玉
百繭裙邊土有香
一種相思忘不得
酒禪茶話夜初長

渡黃河

驚流終古自奔渾
又喜霜瀾復舊痕
東去幾時歸絕漠
西來此水界中原
千里曲今難信
五百年清遠莫論
見慣風塵應笑我
白頭還此渡征轅

渡河入淮船作

懷古田舍詩鈔卷二十三

三

鹽河渡了又黃河
一日車船五度過

車過鹽河至王營換小車渡黃入淮

從此風塵謝鞭策
又來湖海看烟波
金焦已負重陽

約舟楫聊為安樂窩
見說牡丹名字好
無花無酒待如何

僱船名牡丹頭

黃河

一醉卧思忘不得
醉醒茶話夜初長

臥然坐午明
醉醒三覺對土人
醉正百端

醉後同心
醉後風來
醉後不覺
醉後

懷古田舍詩鈔卷之二十三終

懷古田舍詩鈔卷之二十四

漢軍徐榮鐵孫

乙南集下

起乙巳十月初一日發清江至十二日抵杭州

十月朔日清江舟中

昨日天晴今日陰南來幸已謝風塵敢言拚作篷窗雨
輾輾長途尙有人

聞奉化有警

民意輕官久誰為未雨謀外攘無勁氣內聞可深愁事
倘傳聞誤言曾筆札留

繆南卿曩宰奉化曾為懇切言之

吳興財賦地

懷古田舍詩鈔卷二十四

一

更切杞人憂

發清江

長淮秋淺兩隄高欵乃船行趁落槽薄暝已看沉遠水
夕陽猶自帶平皋關前燈亂帆爭泊舟畔琴清筆自操
恐有袁宏能詠史風塵何處欠英豪

郝勗有操洋琴者

過淮安府

淮流瀾瀾拍長隄高與甘城雉堞齊公路浦遙通府北
子喬山古接雲西道傍漂母仍相遇市上王孫孰品題
欲訪溪南詩老宅寂寥門巷午雞啼

曩張亨甫為余言山陽魯蘭岑孝廉

一 同爲詩壇畏友朱述之亦知其人云善畫雞有魯公雞之稱頃欲訪之居人有知之者云在清江未歸也

泊寶應

相逢鄉里共招呼客況雖寒幸不孤

謂同行兩姚君榮臺敬亭番禺酒具

人遠道征衣禁雨雪故山情話感莼鱸雲中聽雁書難

寄籬畔逢花酒易沽且與普天同舞蹈六街燈火醉珠

湖初十日

皇太后七旬大慶是日寶應縣城已張燈彩

淮南

淮南四百里淮隄如砥平淮漲幾時滅洲草已復生寒
蘆冒秋雪涼烟搖午晴擁衾信柔艣臥聽鷗鴉聲心知

懷古壽鈔卷二十四

二

西窗外一片湖光橫莫論漁釣事恐惹蓴鱸情

初三日寶應道中

泥甸莊西曉霧生長隄裊裊一絲橫湖光欲上雲陰下
天水空濛認不清

雲腳篩勻雨似烟江南新酒菊花天人聲忽起垂楊岸
撐出珠湖賣蟹船

高郵道中

江城遙識古秦郵西去茫茫大地浮八百里湖當面受

何因止號小黃樓

高郵西門顏曰小黃樓

紅帘颯颯暗香浮
橘淥冰花雅號留
便與蘭生同記取
醉鄉誰續酒春秋

高郵

秦郵亭古舊曾聞
天末孟城氣象分
湖影三層朝翠堞
塔稜一面駐斜曛
林疎鴉補秋來葉
天迴鷹盤水底雲
酒冽蟹肥吾事辦
拍浮今夜任醺醺

泊露筋祠

西風吹水碧差差
漾出蛾眉月一絲
燈火影中聞犬吠
畫船齊泊露筋祠

懷古會詩鈔卷二十四

三

泊露筋祠夜半大風

陡覺萬山呼南風
捲舳艫千羣來
鐵騎一綫隔珠湖
添纜聲重疊藏舟壑
有無誰能如召伯
戲海等夷途

謝公以尚

書僕射鎮廣陵築棗棗蓄水時人謂之召伯棗今召伯湖是也

初四日發露筋祠至揚州

夢中聞說曉帆開
北轉風聲尙似雷
九十里程纔頃刻
七星山影照人來

甘棠廟口樹鳴秋
召伯湖心浪起樓
漫把矯情譏一局
卽看餘澤已千秋

廿四紅橋臥彩虹台星只在廣寒中

謂芸臺師

多應載酒雲

山閣拍板還妨唱惱公

十載同年一面親劇憐晚節尙風塵從教賦出桷榴枕

不得陳琳詫北人

謂孫定夫同年

酒霧歌塵一水香平山堂下作端陽喚回三十年前夢

鄰笛分明斷客腸

憶朱經畲施夢臣兩同年

初五日出由闌關阻風不得渡江

一夜南風勢未降吹開紅霧放吟窗雲心捧日纔離海

山色迎人早過江秋興難禁花粲粲長征誰似雁雙雙

懷古金詩鈔卷二十四

四

金焦只在瓜州口望斷琳宮七寶幢

瓜州

伊婁水畔斗門西送客詩留太白題芳樹楊花看髮鬢

兩橋雙閣已淒迷北湖築埭曾名召此地開河舊姓齊

好立明禋報功德叢祠猶勝祀無稽

舊唐書元宗本紀開元二十六年潤

州刺史齊濟開伊婁河於揚州南瓜州浦案太白集題瓜洲新河餞族叔舍人賁詩有齊公鑿新河萬古流不絕及兩橋對雙閣芳樹有行列楊花滿江來疑是龍山雪等句卽指此也

渡揚子江

北風吹盡南風怒蓋海茫茫捲殘霧遮斷金陵百里山

鈴聲苦道公無渡，妬極南船乙乙來。紅船招客久徘徊，我留何戀去無畏。一霎孤帆剪水開，雲飛玉立波心石。

謂善才石猴兒石蒜山郭璞墓

浪花白裏青苔溼，斜帆之折浪中行。一

折經時纔丈尺，金山金碧鬱崔嵬。船到蓬萊輒引回，我生遭際亦如此。艱難幸免顛風摧，西望模糊紅霧裏。想見岷江幾千里，順風便擬縱舟航。官限還愁滯行李，灩澦突兀巫峯奇。少陵句裏早相知，慰愁且飲玻璃水。畏晚還吟玉局詩。

入鎮江河中作

懷古會詩鈔卷二十四

五

殘潮隨掉繞城隈，迎客黃花照影開。路遇南船都指似，道儂風裏過江來。

屯雲走馬認難真，百里長山紫翠新。丁卯橋邊有閒地，

卜居吾欲近詩人。

府城南十餘里有小河東來舟人云通丁卯鎮計其地則長山之陽也

年來未盡復瘡痍，不是南徐坐鎮時。劉尹柳條袁尹竹，可能談笑卻熊羆。

耽吟

南風作意阻歸旗，黃鶴山遙遙待櫂枝。訪古自憐爲客，鬢耽吟翻願到家。遲楓酣霜野如人，醉稻熟江田驗蟹。

知吹盡石尤吾不悔又緣小泊得新詩

長途

長途行李劇飄蓬帆影鞭絲歷碌中柳外不逢青眼客
草閒今有白頭翁采芝老欲尋三秀縛草歸當送五窮
見說潢池勞士馬猶能叩壘策奇功

張官渡泊

晚泊張官渡人烟十數家疎林巢突兀古戍屋欹斜拂
水愁風尾銜山見月牙船頭閒坐久一一數歸鴉

初六日發張官渡

懷古會詩鈔卷二十四

六

星霜謝晨征烟水便平聲曉臥擁衾聞鶻聲已報丹陽過

推窗看江色岸竹森萬个沉吟南風生擺劃秋陰破農

功紛在野收斂雜秔稌團團童稚懽跋涉我人瘴前程

石尤裏一葉自掀簸梁陵邈逶迤呂城遠遮邏陵口卽梁建陵

修陵呂城卽呂蒙城也茶甌有眞禪一盞陪獨坐

南風

南風狂似虎吹斷繫船樁想見瓦官閣可憐楊子江我
行逢帶水西面啟船窗遲速渾無與高吟意未降

奔牛

孟河東去見分流不遣殘潮送客舟萬弩驅風如走馬
一門鈴水下奔牛人烟漸有三吳俗秔稻仍遲十月秋
卅里毘陵雲外路歸程肯爲呂安留

呂瑤仙同年
曾約過訪

泊常州

輕舟帶暝色來泊晉陵城昨夜丹陽月仍從雲際生芙蓉
秋浦歇燈火夜街晴借問長千里徘徊已負卿

問新張村

欲爲蘇卿訪其弟已夜不果

初七日發常州

毘陵寄旅夢不到湖上山去去馬跡宮柔櫓空濛間南

懷古會詩鈔卷二十四

七

風息餘焰初旭開新顏斷霞挂龍尾東望不可攀時見
百丈影界破天爛扁路轉礙漁磯隄平循蓼灣黃花抱
幽姿在野何寬閒客行亦有程烏飛殊未還前途間曲
水清吟未余慳

謂慧山
曲水亭

疎林鋪

西風吹水半晴陰一雁南來動客心秋色蒼茫何處認

橫林

地名

行過到疎林

慧山

秋陰帶平臬舟行日邈迤慧山擁長雲墮我吟窗裏疏

林乍虧映餘青寫江水前游等昨夢叢桂闕寒藥松風
迎客來泉石實清泚猶聞顧長康癡絕在鄉里謂顧士美彥
籃輿倘舉致茶甌有妙理流憇譏賈胡貪程信舟子吁
嗟風塵蹤庶免山林恥

錫山

卽慧山東峯也

連峯莽莽墮蒼烟白瓦青林望鬱然山色終朝縣城裏
溪流三折寺門前雲生陸羽煎茶水花繞倪迂載酒船
萬歲千秋無錫好兵爭辛苦憶當年山舊產錫古諺云錫寧天下清也往年夷患揚威將軍屯兵此山故云
有錫兵天下爭無

懷古壽鈔卷二十四

八

鏡臺山

俗名小金山亦名王夔墩子戲敗之

九龍峯影翠姍姍玉鏡天開照髻鬟

北來江水至此水最深廣

箇是

鏡臺君不識依人強喚小金山

路上見菊花感寄昆吾

兒時種菊有生涯半畝同園一逕斜異種聘回同趙璧
名姝擁出比朝霞老來約共泉明隱食罷還從魯望誇
冊載經營成底事路人頭上看黃花

泊新安鎮

薄暮發梁溪暝投新安市崢嶸九龍山送客三十里微

風蹙江練波紋一何綺緣涯被寒英倒影空明裏船頭
望穹窿連靄接青紫搖搖指燈火落落戒行李時聞吳
語聲心等照歎喜惠泉酒新漉一醉茶可毀旅夢迷歸
途從渠墮烟水

初八日發新安鎮

殘星照烟艫輕舟侵曉開鈴聲撼遠空驛騎衝風來心
知四明警如聞鴻雁哀黃霸在潁川謝傳當中台如何
盜潢池赤子生嫌猜我家寄湖山老弱愁毡毳計日望
歸櫂永懷酌金壘心急路逾迴歲晏時相催

是日
立冬間程

懷古壽鈔卷二十四

九

得太平一笑心悠哉

太平得勝橋在新
安鎮南二十里

舟行望穹窿山作

短霧依寒水長雲帶遠林一篙前岸轉半角曉霞陰白
雁黃花節思歸望遠心穹窿如有待天末倦追尋

穹窿
山在

澗墅關西
二十里

梁鴻墓

伯鸞天下士經世初棲棲五噫出京都一行來會稽碌
碌賃春役關關椎結妻奉卿亦人豪玉石分塗泥觀人
必於微舉案肩常齊遺言一何達巍冢皋橋西行人每

憑弔落日天淒淒要離彼何人意氣爲之低千秋重吳
會高風拂虹霓

蘇州觀 萬壽聖會恭紀

明月高高照管絃金閨門外擁祥烟千燈夜作魚龍變
十里街成錦繡天想見神仙從下看也如星宿半空懸
從今願作瑤池會後約相期每十年

移泊胥門

笙歌如海水光渾老減風情漸畏喧一櫂悠悠花裏出
載將明月到胥門

懷古齋詩鈔卷二十四

十

初九日發蘇州

平生慕姑蘇旅泊不信宿滄浪信悠悠縹緲譏碌碌古
來佳麗地成敗一轉轂帆涇無賸錦香水有餘馥去
金閨亭燈寒夢初熟嬋娟越來溪微風漾文縠昔人載
鷗夷從此謝簪紱盟鷗與說虎後賢亦卜築

謂范石湖一篇

發胥門五湖訪遺躅

望洞庭山作

東南有洞天乃在震澤中晴峯七十二洞庭爲長雄我
行溯湖梢浩渺乘秋風東山裊長雲勢欲填虛空連村

富橘柚雜選攢青紅
千林帶夕照遠望何玲瓏
側闕西山竒想見金銀宮
娟娟隔人世一半寒烟籠
高颿動游興稊米愁余躬

我友西山翁

謂費崙虛

今時抱關仕成都無新桑柴桑有故

里昔者戎馬間余被嚴檄起殷勤酌杯酒慷慨任妻子
道南大宅中謂可寄行李三萬六千頃正在明窗裏成
言忽因循後約期暮齒鯨海雖恬波潢池又多壘南顧
殊蒼茫人遠室則邇

時崙虛在杭州

吳江道中

懷古會詩鈔卷二十四

十一

挂起輕帆趁曉鴻
山痕縹緲碧雲中
前生倘與鴟夷約
每到吳閭得順風

覓渡橋連寶帶橋
送行木葉冷蕭蕭
分明五十三門水
流出吳淞接早潮

松陵回首渺烟波
楓葉蘆花奈客何
二十四橋都過盡
畫船無復小紅歌

岸邊黃菊鬢邊開
荻港炊烟早飯纔
修到漁船夫婦好
雙雙搖出柳陰來

淺渚寒花鴨自呼
斜風細雨合歸無
從今剪取鷺溪絹

畫我漁蓑八尺湖

八尺湖風雨作

八尺湖南路瀟瀟雨一篷烟霧帆隱約天接樹冥濛林
溼愁歸鳥風高有斷鴻誰能回夕照只在暮雲中

從渠翔石燕莫與石尤俱歸思爭鴻雁風聲學鷓鴣傳

聞龜毀楨訛傳寧波已失怯甚鳳將雛問取西湖月團圓客到

無

泊平望

江流轉轉客程慳北渡橋邊玉一灣猶有歸雲漏微雨

懷古會詩鈔卷二十四

三

何曾夕照寫青山

平望以望見杭州諸山得名時陰雨登橋南望無所見也

銀針出

網湖魚賤翠羽穿花水鳥閒燈彩尙能輝

壽域人心誰道盡癡頑

諺云平望八尺爺娘不識

初十日船坊道中二首

由平望入船坊經烏鎮新市出塘西較行嘉興路近

七十里湖州漕河也

君子有坦途小人驚捷徑誥誥雖先期搖兀及未醒推

篷辨江岸回篙已逕庭生涯久紆阻付物且因應枯桑

露田舍殘荻隱漁磴虎橋宿烟散龍壩曉潭瑩何嘗異

光景聊復供眺凭吟鴉聽雙艫前後若投贈夷險信前

程嘯歌有餘興

畫裏鴛鴦湖夢中烟雨樓極樂魚有國多情花繞舟醉

里計前約習池孤勝游借問梅花廳已有陽春不暗香

映清節瓊李思報投

謂家信軒太守曩余贈之墨梅報以畫竹並約同游湖上梅花廳即

太守廳事也

歧路誤成言暮雲增別愁一笑問舟子利涉吾

何求南風正驕妬前途仍阻修捷巧將何成人事良悠

悠

自烏龍壩至烏鎮

連林遞遠風浩蕩江色開岸花何冷落雲鷹自徘徊舟

懷古齋詩鈔卷二十四

三

行計尺寸艣聲有餘哀隔窗問南船曉發寒山來

寒山至錢

馬頭七十五里時尙未早飯也

南來有輕帆倏如鹿車馳偃蹇正笑我飛騰方在茲盈

滿不知足一蹶悔莫追從來患難生亦在得意時

錢馬頭有

覆舟者

我從太湖委將溯湖源行湖波巧避我但遣支流迎想

見三萬頃連天走風聲寄語靈威君移家尋後盟

自寶帶橋

以南水皆太湖支流也若雷二溪出湖州乃太湖之源矣

著書陸魯望刺舟張志和家口問鳧鷖頭銜署烟波路

上逢釣徒船頭挂風蓑敬之欲借問敲舷發長歌

雙塔表烏鎮萬家團碧烟日飲雲溪水門停震澤船忘

機漢陰叟謂楊飛泉司馬潘湘門太守嘗呼之為漢陰丈人坐嘯曾翩翩中流

孰砥柱河中石塔大書戎馬方需賢時司馬調省未歸

弁山渺何許落日孤雲低驚風吹白蘋洲樹烟淒迷司

勛碧瀾飲太守窪樽題招尋倘未暇西望歌銅鞮謂羅澹邨

太守

太師橋在烏鎮北五里自此轉西北行

太師橋畔路轉轉入斜曛敗葦鳴寒浪饑鷹溯晚雲烏

懷古會詩鈔卷二十四

十四

青雙水合江浙一亭分橋北有亭為江浙兩省分界處戎馬關心極逢

人間寇氛

題畫梅寄劉月鄰

老榦槎枒百尺留影疏香暗莫深愁狀元宰相安排定

且放孫枝出一頭

泊吳家濱

孤邨何惹龍烟火數十家斷港接通津連林棲遠霞舟

楫皆入保慰藉意有加行李無萑苻抱關有生涯我來

纜高柳吟聲動蒼葭舵樓罷晚飯江天看歸鴉濼濼夕

陽水星星籬豆花
時聞響機杼
雞犬靜不譁
未敢輕十室
忠信誠堪誇

夢醒作

孤艇寒燈夜
作花旅魂飄
泊久天涯
憐渠夢境還
分界行過吳興始到家

十一日發吳家濱

江村常早起
侵曉聞碓磨
高柳挂危霜
落落星幾箇
舵尾雞屢號
篷背篙尙臥
戒途慎行李
後發我寧懦
西風吹長雲
俄傾江色破
窗東日華入
港外天影大
照水桑

懷古會壽鈔卷二十四

五

圩閒衝烟艫
聲過連市青
渺茫寒山遠
嬰娟孤雁方
南征高吟倘
余和

連市紫藤花

連市連雲橋
北路岸西驚
見紫藤花蟠
根已閱百千
載落影橫鋪
廿五家坐想
春風篩絳雪
天開雲水照
紅霞吳娃盪
漿笑相問此
地何曾輸若
耶

自連市抵新市道中

鷺鷥待游魚
閒立蘆花磯
鷹隼亦求食
終日盤空飛
白鷺不餓死
蒼鷹仍忍饑
請君課勤惰
茫茫誰是非

寒山好眉黛獨立當待誰孤高餘塔劫冷落翻松漪物
情有盛衰善保娉婷姿昌丰士女會乃在清明時

蘆渚隱黃花青林閒紅葉倒影來清波光淡相接推
窗望山色積翠正稠疊方吟畫中詩且緩風前櫂

桑圩亦有稅荻港亦有租魚游與鶴立踏地誰能造仍
聞田舍翁負擔求樂輸飛舸難凌風何由達京都

白鷺映青草處世忌奇服食蓼而茹萍作齋不蒙福頗
憶承天言修善得顯戮紫燕接飛蟲終身處華屋

天末吳羗山鏡裏餘不溪流雲入新市延翠來平畦魏

懷古會壽鈔卷二十四

夫

公有別業聞在明霞西上下五百載風流誰與齊

稚川令句漏非祗求丹砂訟庭有餘事著書成一家峩

峩兩天目隱隱標青霞朱邑來何時山色當排衙謂朱述之

明府時在杭州

踏遍橋

風颭斜陽上柳梢餘不溪水碧迢迢斷雲流過三鴉路

齊泊仙人踏遍橋橋名相傳仙人所題今圯

荷衣湖上望見杭州山作湖在新市南十八里八水分流處也

望見杭州天半山荷衣湖上一開顏五雲擁樹青常溼

八水流花去不還
漸近歸程仍旅泊
正思吏隱復時艱
明朝輒腳西湖會
誰信臣軀未盡辱

泊曹家濱

未至塘西四里濱北屬德清南屬仁和

夜泊曹家濱移舟入清樾
柏林飽風霜若水見毛髮
人家罷歛獲蠶桑亦已歇
時聞雞犬聲雲深望髮髯
幫船半南北人語雜吳越
我程已咫尺北路正悠忽
猶嫌武林水為德乃不卒
荒灣帶兩郡留客日滑笏
船頭仰高空一半杭州月

十二日發曹家濱

懷古會詩鈔卷二十四

七

疎林千葉紅殘霧一江白
移篙入杭州船頭近咫尺
塘西來時路霜草已如簣
差我碧天橋橋名浩蕩九水濶
湖山凝曉妝殷勤迎去聲歸客
分明雲樹中示我舊游迹
時事雖艱難簡書正充積
須為越石舞肯容謝公屐
燈火話團圞且復永今夕

阻風

天際歸舟捲旆旌
青山多處認杭城
秋將離畔千花送
風走雲中萬馬迎
遙訊羽書增客感
漸經人事減詩情
家人若問南來雁
已過臬橋早寄聲

到杭州途中作

縱到杭州不是家團圓且復慰天涯孤雲行處原無意
明月宵來含有華南北道途爭旅雁官私身世問鳴蛙
曾承

別殿從容語老去猶堪向客誇

夜話遙知月滿簾問程一一數郵籤闖人吳越燕齊遍
作主山川風月兼輦腳酒須通夜醉紀行詩已逐時添
西湖知我非生客面上風塵定不嫌

鐵壁銅山有品評敢教僕射愧幽明

玉坡師奏保有結實可靠之目坐

懷古田舍詩鈔卷二十四

六

看人世風雲幻自信吾家海岱清大象得來憑夢寐小
車乘出恥生平歸裝只合添書劍重與金沙港水盟
道路傳聞信未真四明山色又蒙塵豈無龔遂更齊俗
祇要區夫活費人慇懃正防非類子馳驅原許在官身
哀鴻不似常時語誰遣嗷嗷入耳頻

懷古田舍詩鈔卷之二十四終

懷古田舍詩鈔卷之二十五

漢軍徐榮鐵孫

銅瓦集

起丙午二月查看寧波善後工程南行至銅瓦門三月回杭州

梁大中丞檄查浙東善後工程二月十六日風雨

渡江舟中口占

中丞籌筆慮殷勤談笑曾看解粵氛遺愛尙追湯信國

浙江沿海寨城皆明信國公湯和籌建談兵還許杜司勛旌旗北去開三

畧中丞以十五日往查浙西善後工程兼閱營伍書劍南來張一軍擊楫試歌

鏡吹曲浙東風雨浙西聞

懷古田舍詩鈔卷之二十五

三船詩

紹興河中船有三奇舵以轉水一舟司命龍門之船舵乃倒插畫鳳飾觀備而不用

此一奇也手以蕩槳天下所同此間小艇易之以足此二奇也船式尖長所以適用野水小渡其形斗方界繩河中牽挽以渡此三奇也久欲紀之因循未暇十七日復行此河觸目賦之

曉日瞳矓排畫舸鳳凰飛上朝天棹劃破長隄一抹煙

勸我吟詩天上坐天上輕雲水底飛越山分翠照篷扉

會稽鎮上朝香去賀監湖頭載酒歸

右龍門船

朱髯畫兩舷烏篷卷一葉黃頭素足郎打槳迎桃葉

鏡水碧蒼蒼歌聲聽漸遙臥吹蒼玉笛穿過菜花橋

眠雲若耶溪踏月樵風渡聞聲惜推篷未是凌波步

右足搖船

兩頭繩子繫荒灣方渡無人盡日閒採得蓮花歸去晚
斜陽四面看青山

右方船

十八日渡曹娥江

山意曉惺忪娥江早霧濃日高寒誤月樹暗碧疑峰幼
婦碑難繼天孫石不逢

江中有落星石問無知者

蘭風山名青咫尺來

問葛侯蹤

懷古田會詩鈔卷二十五

十九日大寶山弔金華副將朱將軍

貴

江田啞啞大觜烏曾餐戰士忠義膚一千戰士同日盡
將軍者貴袍罕朱往歲征夷期晦節大營十里長溪列

妙選前驅屬陝甘大寶山前飛鳥絕

壬寅之役揚威將軍駐東關分遣總

兵段永福南指寧波遊擊劉天保北指鎮海期以正月晦日同時進襲左參贊率大兵駐長溪嶺上令朱將軍率陝甘兵一千駐慈谿縣之大寶山為中路前驅安徽同知張率鄉勇千五百人駐寧鎮交界之駱駝橋為南北兩軍策應
明州兵挫靜海奔駱駝橋卒招驚魂壬寅

二月初四夷獠遂來攻此軍

師期漏洩正月二十八日南北兩軍皆先期舉

事同時敗潰三十日駱駝橋鄉勇自相震驚初一日奔至慈谿初四日夷人遂來攻大寶山矣
此軍沉

沉氣深墨誓滅天狼乃朝食刻缺豐隆天半飛鬼蜮沙
蟲肉狼籍諸侯高從壁上觀起辰達未援兵慳

已報輪船添散坂又聞節度潰潼關夷兵千人由小西壩

登岸過來田橋清道觀循慈谿東門繞北門來攻我軍擊斃夷人甚眾自辰達未

丈亭踵至由散坂橋登岸進攻又聞長 嚙齒結纓呼殺

賊今日此身當報國父子師生忠孝門地下相從亦良

得夷奴扶拜公凜然裂背不改生前色將軍子武生昭南昭南之師顏

心齋明府履敬皆與將軍同 後龍山夾田橋設伏何不

相遮要硬寨死仗公自許苦恨兵單愁卒驕縣城入保

懷古田金詩鈔卷二十五

三

亦隅虎告公不聽知無補豈有孤軍得自全公身一旦

心千古時有建議設伏夾田橋後龍山者公以兵單不能分乃調駱駝橋潰卒往伏率皆不應間有往

者望敵輒潰又有勸公入保慈谿縣城者 嗚呼我及挽

公鬚笑許書生膽氣羸雀翎五色指示客說到

君恩聲淚俱五年重鼓慈湖權額手雲端見新廟蘋蘩

未禮國殤魂風雨驚聞山鬼嘯寄公一語公應嗔海上

鯨鯢氣未馴倘見堯光千歲猗奇謀勿吝告時人余嘗識公

軍需局中指翎冠以示曰征西口時 上所特賜

者也又言安徽堯光山中產獸名猓取其油置海水中

波盡燃若得此以燒夷船片板不能還矣猓人面獸身嘗於文書廢紙中圖以見示今藏之案南山經堯光之

山有獸焉狀如人名曰狶裹見則縣有大繇註不言其可以然海歲癸卯慈谿縣民於大寶山上立廟祀公

贈王雪軒明府

議濟杜湖贈詩堅之

君治杜湖水又開天一重

杜湖舊謂第二重天言生物與天同也

山根規

萬井花裏課三農民信勞非厲官勤戶可封任

侗吳潛

遺澤在努力繼前蹤

二十日小西壩待潮不至船攔塗中風雨大作

幾尺春泥攔短橈窗聽厭雨瀟瀟風狂已斷東西渡

海信休慳子午潮礮水濃雲兼浪捲戰場芳草向人驕

咸康城郭仍如畫止隔鄞江一綫遙

鄞縣城乾道圖經云劉牢之築以塞

懷古田舍詩卷二十五

四

三江之口寧波府志駁之謂晉末此無縣治斷以為唐末黃晟所築道光二十五年修城多得古軌有字云咸康三年八月廿日蕃作余從舒厚菴司馬乞得一方案晉書劉牢之傳太元初應謝玄募為參軍隆安中擊孫恩立城當在此時而咸康乃晉成帝號在隆安前六十餘年是城亦不始於牢之經志皆誤也附識於此以諗後之修四明志者

二十一日寧波城上作呈王西樓

丕顯

賴芷泉

兩明府

金峨山北大雷西風雨如磐野望迷豈有石窗通日月

直愁人海臥鯨鯢

三江口泊火輪船一號

經餘戰伐春無賴詢到

遺聞語漸低

辛丑八月二十九日夷人由鎮海入寧波府城是日提督余步雲知府鄧廷彩知縣

王鼎勦先已出城奔上虞城
回首潮頭堪痛哭蛟門天

險惜九泥蛟門實鎮海門戶曩余庚子至鎮建議大門

將以蛟門兩島孤峙海中兵無去路
大仇余言自是無議守蛟門者矣

二十二日小潮音洞作即仙人洞也在鎮海縣招寶山後路至險仄逼臨外

海洞正中鑄小潮音三字

招寶南來面回顧脚插海心無去路忽開洞口接狂潮

呼吸天風有餘怒風怒潮狂霹靂驚奇兵已入威遠城

將軍棄甲督師走倒海翻江聞哭聲辛丑八月二十六日夷艘入犯鎮海

以一艘攻招寶山南面一艘攻金雞山北面而潛以小舟載兵由此洞上山入威遠城城內守兵驚潰又以一

懷古會壽鈔卷十五

五

舟載兵由沙嶼嶺攻金雞山後金雞山兵勇亦潰時提督余步雲守招寶山兩江總督

入城裕投水遇救退保寧波時平仍見橫雲堞我攬垂提督亦奔寧裕已仰藥自盡

藤有餘憎雲影懸空路似繩海光潑眼身如葉往事空

傳六國來平倭勒石亦雄哉不見周嵩出下策定知李

勢是奴才洞外左方石壁橫刻平倭第一關五字大皆二尺餘題

署小字苔纏不見以義考之當是俞大猷盧鏜諸人所題寧波府志以為王安石書無可據先是二十年鎮海

設防城外鉤金塘設有四礮可防此洞上山之路余至見其險要白劉玉坡中丞添設大礮三門及裕魯珊制

軍來替伊莘農節相督師兩浙令江蘇候補知府黃率鄉勇助兵守金雞山乃謂鉤金之礮無用盡撤至金

雞山夷人後竟晚潮拍面催歸屐南望金雞增歎惜一

樣飛來沙嶼旗臨時不得郎機力奇奇正正古來聞爭
遣排成一字軍已看金湯重部署莫令風鶴更紛紜頭
善後工程余囑張雨樵司馬謂意鉤金塘
今已築海成隄可安大礮一十九門矣

招寶山放歌

君不見浹口江寄奴大艦排旌幢長生人潰水仙走築
城置戍來句章宋高祖爲劉牢之參
軍時擊孫恩於浹口又不見巾子山行

人斷舌懸高竿越國樓船出東海天上白虹翻紫瀾張越

公世傑度宗時爲水師統制次定海元將石國英令
都統卞彪來說之降公斷其舌傑之於巾子山下朝

潮夕汐改人世豪傑相望異遭際臨山破直亦論功姑

懷古會詩鈔卷五

六

渡擒倭還就逮明總兵俞大猷破王直於烈港臨山復
擒斬倭寇三百餘人於小姑渡胡宗憲

効其縱倭不追逮
詔獄疏辨得釋雲中樓櫓鬱參差都督威名蛟鱷知

盧鏜爲總兵始與副使譚
綸築威遠城於招寶山上天險尙傳盧氏壘海鋒爭避

戚家旗戚少保繼光曾爲鎮海總
兵倭人望其旗輒避之英雄事去青山在重

見龍旂照瀛海鬼皮韜輓馬纏腥乘出一軍齊喝采辛丑

六月霽霽鄉人獲登岸之夷人嗚嗚地里是等二名送
軍中裕魯珊節帥剝皮抽筋以號於眾其奏疏有云活
剝其皮以爲奴才馬韉生
抽其筋以爲奴才馬韉傳聞倭敗五羊盟廈門險失

全閩驚夷人在粵和約已成忽復敗盟駛攻福
建廈門七月二十八日復來浙洋翁洲血

戰凡六日絕晒竹山無救兵夷船八月初二日攻定海
至初七日始陷壽春鎮總

兵王錫朋處州鎮總兵鄭國鴻定海鎮總兵葛雲飛死
之參遊以下死者三十餘人竹山門由鎮入定之路也

救兵只在蛟門西雲屯招寶分金雞悲笳沸海風月海

列帳連山霜雪低早潮忽打攔江岸火輪飛過蟲沙散

傷心地上走元戎空有蘭筋無款段注見潮音洞詩威遠城頭

落照新山花又報太平春我來只灑潮頭淚此是古來

征戰地

二十三日鎮海縣雪中過江閱南岸礮城

海聲潑枕征魂懍明朝當渡浹口江醒來顛風撼屋瓦

忽有雪珠穿曉窗二月陽春陽正豔豈有陰霾敢潛見

懷吉田會壽金卷二十五

七

飾柳初兼雨作絲欺桃旋放花成片隔江山作琉璃屏

照我孤篷黃葉輕主人有酒且澆膽謂畢曼年明府出門一笑

東風晴金雞翹翹對招寶南北攔江築城堡中流跋涉

尋筓山臥著老巖當此道南岸攔江阜及金雞山之西南角東北埂三堡遙遙相對又辛

江阜東嶽宮及招寶山之威遠城三堡遙遙相對又辛丑之役夷人由小浹港登岸出沙嶼嶺繞出金雞山後

與山前兵船夾攻於是金雞山鄉勇先潰兵遂不支狼山鎮總兵謝朝恩死之今於筓山內築堡以防入港之

路太息亡羊莫重論補牢辛苦亦虛文疊石縱排諸葛

陣如山終要岳家軍蛟門潮吼虎蹲怒碌碌天涯且行

路青山替人擔古愁一夜白盡雲中頭

罌頭廟

在大嶼頭祀宋劉器之先生

天涯尚有罌頭廟嶺外曾傳鐵漢樓濱海衣冠新俎豆
完人名節宋春秋蘆山擁雪朝香案硯水流雲護稻疇
清絕齋宮容寄宿簡書多故惜淹留

二十四日發大嶼頭至穿山

又逐雞聲去遙穿曉瘴行百家成小聚四角見孤城已

失依山險新移出海兵

舊城明安陸侯吳傑築半跨後山順治十八年移置平地其形

斗方今修仍之改提標左營為水師遊擊率兵三百人駐此千總率兵二百人駐郭霽

極天疆畝

濶誰與議屯耕

例水師應更番巡洋近日船薄兵貧怯於出海以故盜風漸熾余意此方居人

懷古田會壽鈔卷二十五

八

耕海為業魚鹽之利倍於田禾若募之為兵給以貲本官督出洋以鈞代巡數年之後兵用日充人與水習或亦備武之一端也

劍嶺

到地水聲靜上山人意忙駐輿善種寺蓄力瞻前岡倚

天芙蓉色淬石生寒銳初登俯龍淵卽漸盤魚腸罡風

一拂面心知來上方了了見炊煙山城浮海旁

下嶺五里卽霽

城霽

郭霽

信國遺蹤遍百蠻天涯猶有郭霽關潮聲截斷桃花嶼

震陣橫連箸舊山南對定海桃花六橫等嶼城西高山名箸舊有墩臺七萬里

帆城下過英吉利去中一雙鷗鳥日邊還誰教小覺撓

全局回首翁洲戰血殷二十一年七月霽霽人獲上岸黑白夷人各一名裕魯珊節帥

剝皮抽筋以示軍威

二十五日發霽霽

孤城跨山脊未曉生海光閩帆已收舵越客方嚴裝出門履春露遠聽雞聲長是時萬山雪出沐晞朝陽炊煙蕩深竹前路天蒼茫何用慰旅愁時有梅花香

大度嶺

懷古田舍詩鈔卷二十五

九

身外盡青山眼前生白霧隱約時聞泉迷茫但分路來時識劍嶺凜凜慎跬步庶幾持小心豈謂客大度不見青芙蓉錯愕方四顧驚聞僕夫言一笑余乃誤

柴橋

霽霽望柴橋復似來人閒柴橋亦何有蛋雨人煙蠻小聚近千家巍祠朝眾山桓桓宋副使宋兩河副使劉幹字仲假九捷

銘刀鏗兩宮既北狩有憤不暇潛片紙付兒輩二姓余

何顏誰謂人心殊大節立懦頑岡西古佛寺題識何班

班至今有生氣血食來人寰康熙歲癸卯降神告市闌

早蝗汝呵護飢渴余恫瘝壁間讀遺挂英風誰可攀忠
義不我負胡爲踰大閑君看千載後香名遍荒灣

由新茶亭抵阿育王嶺四首

分路鎮方庵西趨育王嶺轉轉入山腹巖岫變光景循
河問瓊瑤絕底走雲影亦復開平田了了數煙井綫路
爭牛羊佛法本平等小憩萬嶽山茶禪偶心頌

河水深更碧松嵐春尙寒倒影落明鏡乙乙羅煙鬢梅
花菜花節東橋西橋灣時逢拾翠人盪槳空明闌持花
倘獻佛濺裙殊未還試教放兩手庶抵參三關

懷古田舍詩鈔卷二十五

十

新安有廟貌乃祀江文忠入門我肅拜殿角生長風襄
樊事已矣五國悲無窮江神呵護奇村社烝嘗豐直道
在三古人心忠義同英靈孰來往東西兩劉公

大碑祀劉器之

先生柴橋祀劉仲復副使

高巖屹湧現上塔中天懸奇光感薩訶一闕餘千年林
巒被慈蔭早暮生祥煙心知阿難迹卽在飛雲邊攀躋
恐中墜化石當誰憐前途有歸宿洗念朝金仙

禮舍利塔作

見如白珠

佛自在我心世故縈擾之我佛尙不見何用舍利爲山

僧苦勸密隨人具威儀乃以色相見反生無相疑示我
衣中珠微意我自知八萬四千所想像當如斯可憐難
頭禾辛苦爭佛髭歸來扣方寸光明恐無時輾轉不得
眠中夜生深悲

阿育王寺晉松舊有放光之名頃遭夷辱全樹就

萎余擬改爲忍辱作歌紀之

神龍東來朝舍利癡戀佛光飛不去飽餐晉雨櫛唐風
鱗甲離披成老樹甘隨烏石守江湄親見才坤灑墨時
山有烏石成袈裟紋相傳諸僧隨阿育王安舍利塔已
飛渡海去其未得道者墮地化爲烏石又方丈後巖有

懷古留舍詩卷二十五

十一

葛稚川書
才坤二字

枝杪能回萬牛首曾元已養千年兒聞道松

堂開玉几光景俄隨笑翁指三生圓澤不重來百丈吼

髯今若此

張樛寮書玉几松堂額尚存寺中張嘗問笑
翁舍利何在翁指松日見否卽有珠光纍纍

遍綴枝杪故名放光松笑翁語張曰此松枝到地吾當
復來計去今六百餘年松枝到地亦已數十餘年頃且
萎矣兩枝委地三撐空我未拜佛先拜公前身行者倘見

許蹉跎不及聽天風問僧未語色先黯在歲壬寅賢劫

慘龍天也避阿修羅羶醎漸汗金齒苔卻敬蒼官爲寫

真摩挲一夕風雷噴滿川花好畫不就思人樹化星應

淪

僧言夷人時來撫翫兼寫其真以去
自是遂漸黃落今歲無復新斲矣

吁嗟誰受大夫

爵遼海歸來愧元鶴岳家畱柏解旌忠孔林有檜能重
活此松未死會逢春語僧封殖戒蕘薪改名忍辱從今
始莫更放光驚世人

二十六日發阿育王嶺入寶幢河至鄞縣四首

我適天上宿衣有天邊霞啼鴛遠送客一路看梅花穿
雲久已厭入船如到家湛湛寶幢河脈脈新柳芽一篙
破山影中林驚乳鴉回頭望玉几漸有浮雲遮

天童倚大白夙昔擬乘興松風二十里在眼如可聽萬
山拜孤雲一水蒼寒磬潮陽亦鄉里臨濟幾宗乘未可

懷古用舍詩鈔卷二十五

七

煩供張寧當負名勝筇枝期後遊展兩有前定

天童寺有

孝陵御書柱聯云孤雲臥此中萬山拜其下國初
僧木陳潮陽林氏子頃賴明府聞余將往遊大具輿從
以待因不果行

育嶺有徐碑大和乃重募

徐嶠之書常住田碑燬於寇
大和七年范的重書今石存

舍利殿左

寺僧惠拓本展讀忘飢餉宋文始賜田梁武蠲其

租辛勤歷七世以有千金湖

綬濟曠簡皎
惠法凡七僧

我聞王舍城

至尊享沙麩目營與心嗇亟亟胡爲乎

河流自空宕人煙漸淒迷搖漾鮑郎山掩映桃花谿閨
年氣尙早桑柘綠未齊高樓問海曙俯見通闌低年年

橋上人憧憧走東西笑人亦自笑此豈吾安樓

二十七日發鄞縣至四角亭

月湖生曉煙開窗見新柳春風入庭戶清景非我有南
門市何早北渡水亦瀏孤亭指四角老樹森半畝蜂寒
得花遲僧貧待茶久前遊憶歲月忽忽一回首勞生感
行役伏處歎株守臧穀均亡羊得失誰爲剖

斯民

斯民直道最難誣平政那容攘臂呼買犢幸逢龔北海
活人能用治區夫仍看耕稼千山靜稍展旌旗萬骨枯

懷古田畝鈔卷三十五

三

好語蚩蚩安爾業藁竿懸首痛心無

去秋奉化之案始於加賦成於阻考

終於拒捕傷官遂至調兵盈萬幾於盡勦其實銀價日昂征解不足丁錢稍長民亦非不肯從也縣徵兵米向係折交米價方賤而折價不減祇益丁錢道府屢次曉諭皆不及此不平則鳴勢有然矣二三奸民從中構煽遂成民變梁楚香中丞至郡廉得其實一意主撫令傳菽泉明府往理論之縛獻首匪要從共三十餘人分別誅遣事乃冰釋

奉化道中

奉化七里霧春分三日雷過橋山影醉到岸海聲迴蚺

子熟仍種鳳花寒未開

縣南三里寶化山上有鳳花

拖鞋逢老衲霑

溼笑重來

縣志布袋和尚晴則曳屐雨則拖鞋余庚子十二月至此亦遇雨也

二十八日發奉化

野店門臨水，茆簷樹有窠。河流經雨壯，鳥語向明多。星照紅巖飯，風傳小海歌。亦知春睡美，王事敢蹉跎。

太平庵早飯

海眼山頭雲縷橫，海鰻吹雨作濤聲。庵對梅山山上井水應潮名海眼井

又靈濟泉有九節鰻能致雨拖泥帶水客辛苦，喫飯穿衣僧太平。看到黃楊知有閨，馴來白鶴共忘情。打包又指梅林路，行脚忽忽過此生。

脚忽忽過此生

柵口嶺

懷古田舍詩鈔卷二十五

四

中天飛翠灑松篁，倒劃春嵐石磴長。盤過雲心看滄海，

行穿雨背見斜陽。寒梅二月千林雪，行李重來兩鬢霜。

七載經營成太息，舟山如畫隔重洋。庚子冬夷人方踞定海余奉檄履勘

寧台溫三府海口曾過此嶺今歲丙午余復奉檄查看浙東善後工程再行此路時粵東入城之議未定夷人尙據定海不還

海不還

江瑤宿

鄉信迢迢夢不真，五羊城郭又逢春。萊公議幣曾和寇，

瑕呂申盟好卻秦。許和兵費二千一百萬圓已交一千九百萬圓去臘交足二百萬圓即可

取還定海銀已備矣而夷人復議入廣州城始將定海交還官雖許之民議譁然十二月十八日已焚廣州府

署至今尙未決也
海上山川懸趙壁
天涯風雨滯勞薪
誰知豚柵雞棲處
也有憂時感事人

二十九日發江瑤過塔車嶺

言趨梅林村南過塔車嶺
萬松盤一道宛轉級修綆
嵐光壓炊煙空翠滴
人影小步看山花
泣雨香未醒
清曉無行人幽趣
我先領山鳳啼一聲飛雲落峰頂

桐嶺

桐嶺二十里嶺瘠樹不肥
晴雲照雨路初疑
懸瀑飛駐足樓
阮橋躋麓力已微
東風拂人面
海上我衣了了

懷古會詩鈔卷十五

五

數十村問名半是非
惟有瓦雞山來路生煙霏
我來亦有年在子
今建午松田綠如海
昔稚茲可撫
山花幾陽春
山色自太古
雲中工闋人笑我行役苦時事仍艱難
身世豈自主
客髯雖已斑
臣心早相許

絕頂倦躋攀奇峰尙雲裏
咋舌問僕夫幸哉不出此餘
青何複沓高田自邇迤
到海山勢迴踈足不能止
巢居羨石戶散步貸輿子
春疇問鴉芋亦足觀
物理麥田中時有紫

花問山人言是老鴉芋其根亦可作麪荒年以代糧也

茶浦早飯

迎面東風破曉霞正吹晴影落山家披翎鴉曬連朝雨
接翅蜂趨向午花巖瀑新流雙劍直嶺雲來路一繩斜
前途舊識湖陳渡莫遣清溪照髻華

湖陳宿

平生山水不曾廉三宿湖陳野興恬一夜溪聲搖燭影
半空嵐翠潑樓簷觀河事已滄棗改

主人言甲辰溪漲樓傾今始改建

到枕潮疑風雨兼莫向征途論歲月階葺明日一萌添
三月初一日發湖陳度西溪嶺二首

十里長林霧不開春山未醒我先來但知路繞溪聲轉

懷古田會詩鈔卷二十五

夫

忽有潮浮日影回晴野客程乾鵲報遠村田飯曉雞催

七年書劍重搔首認得梅林古爨臺

嶺西爨臺明胡梅林防倭所建

穿盡叢篁路阻修西雲庵頂試回頭炊煙白現華嚴海

山影青搖芥子舟林鳥一聲行不得瀑泉千尺去難留

客程定被雛僧笑也逐溪聲下泗洲

泗洲頭去嶺頂十五里

霞前渡

飯罷洲頭路舊爛菜花深處認鸞環波鋪錦綺霞前渡

田劃袈裟屋後山風雨尙思前度險

庚子過此風雨有詩紀事簡書

難貸一身閒滃洲羊石無消息門戶仍防銅瓦關

時往石浦

查銅瓦門
各處礮臺

霞前渡舟中作

一山臥中流，四水趨大澤。嫣然明鏡中，有此娥眉色。飄然孤艇泛，因之退潮力。長天入遠海，南望浩無極。分明拓耳目，今古盪胸臆。東風一披拂，弱櫓乍欹側。輿人實天全，登舟已酣息。猶遜雙鷗鷺，皎皎振霜翼。

外韓莊折桃花亂插輿中

天教一路看春風，親折高枝認小紅。贏得兒童齊拍手，桃花開入筍輿中。

懷古田書鈔卷二十五

七

放歌三首

人生何者自羈束，十丈紅塵強狗俗。杭州一住動七年，雖賦閒居苦忙碌。低頭官鼓祇厭聽，空手債臺那許築。豈無薄奉助薪水，亦有虛名帶兩局。

登復局清查局

出門半月

已斷炊，寄書屢貸監河粟。嗚呼古稱行路難，行路思家那忍餐。

人生有命我得知，雁過畱聲豹畱皮。何曾餓死沐德信，

豈有易心吳隱之。羅侯餘姚昨饋金百餅，日無所爲吾誰

欺。畢公鎮海無爲辭以驢，苦累州縣應非宜。篷船菲店自

託足此意豈與供張期嗚呼軍儲八百萬但染銷銖當飽飯

人生好作田舍郎抱孫課子不出鄉東風漸長三白麥老困幸有經年糧築隄已就放春雨賽社歸來眠夕陽梅花桃花菜花香清明未來遲種秧牽牛洗耳上流水養鴨呼名春草塘嗚呼官府莫渠羨不見馳驅塵滿面宿新橋孫店待譚竹君明府

繞戶一溪水窺簷十二峰雪聲寒不減煙翠晚來濃聞道幼安榻曾畱元亮蹤火城遙望處失笑定相逢

懷古田會詩鈔卷二十五

夫

初二日發新橋戲贈譚明府

新橋日照店門開張蓋鳴金後隊催半破烏篷肩輿名都訝我不曾避得縣官來

一肩行李戛東風只有青山信我窮便作前驅知不稱讓君喝道入雲中

田下嶺

田下亦有嶺雲中應見潮春花農事急初日海聲驕煙樹圖難似風檣望不遙壯懷時警我天半有鳴鵬

昌國城

右提青部左高唐

皆山名

對面山名屏風隔大洋跨十三山

作城郭看千萬里過帆檣古今興廢無常勢

城為明初信國公湯

和建

國朝設昌石營都司率兵三百二十五人駐此營下守備率二百六十八人駐石浦道光二十三年奏定

善後章程併

駐石浦矣

象石東西此巨防

象山在東北石浦在西南

經濟遠居民香火尙思湯

石浦

西南北面控青山東海分流牛角環品字三門通酒港

咽喉一綫扼銅關帆來浦激魚雲黑人雜甌閩鳩語蠻

道是戰場堪歎息戰場春草不曾殷

懷古會詩鈔卷二十五

九

銅瓦門

銅瓦開門接怒潮潮來天上目光搖白浮馬夾牛欄嶼

青點棉花橘樹礁兵甲可憐風鶴散樓船誰縱海鯨驕

古來天險須人設莫恃咽喉路一條

辛丑八月初二日夷船由此門入石

浦登岸毀礮耳焚一艇船而去

初三日發石浦

海外腥雲夜有聲倒吹寒雨入山城癡憐瑋乘潮上

豪恃檳榔破瘴行

居人相戒早起云有瘴也

金漆門遙防暗渡銅錢

礁廢見春耕

金漆門通南田歲有委員駐石浦禁民偷渡銅錢礁孤峙海心正當銅瓦入門之路

往歲防夷於此安礮事平之後所築礮墩已爲肩輿又居民毀去墾爲麥地余屬譚竹君明府修復之

指湖陳去歸路西來第一程

使婦無禪可若何出門一笑柰奔波顧郎自是難衣食

酒敵窮魔東南忽拭憂時眼腰上蓮花擬重磨

春風

如虎春風怒不休長雲北指似戈矛

所見如此

輿牕坐見東

瀛海一點驚帆替汝愁

口號贈竹均

懷古田舍詩鈔卷二十五

三

君行東溪嶺我喚裏山渡

卽霞前渡

一樣愁天風商畧新橋

住

同眠石浦雲分手新橋雨回頭不相聞風煙渺如許

半嶺至裏山路中

裏山春水碧半嶺午雲寒樹繞根頭顧花圍裏外韓

山根

風潮行客渡煙雨釣魚竿明鏡芙蓉色

輸他盡日看

雨中度西溪嶺二首

小憩金山庵遙望西溪頭嶺路十三折了了雲端浮浮

雲尙可登風雨不得休
冥心付輿子聒耳仇鳴鳩
攀躋滑無磴搖兀輕如舟
濃嵐一拂面亂水爭道流
庵僧遠歎客霑溼憐衣裘
我裘不足惜僕夫無褐愁

西溪不易登登亦難駐
足俯首窺叢篁浩蕩無底綠
穿林逐歸鳥微路幸盤曲
青山出迎客一一喜膏沐
溪聲凡七渡雲氣非一族
遙村起炊煙人家飯應熟
茱萸雖逼仄婦子共餽粥
如聞譏遠人何者自碌碌

初三日胡陳阻雨

天上溪聲壓夢來小樓如艇
勢危哉聽殘風雨狂無賴

懷古金詩卷三十五

三

眇極雲山黯不開萬樹寒
牕新瘴起千雞爭曉怒潮催
雞取十餘人同宿 梅林北望知何處一寸心愁自往回

早飯後發湖陳至里安

客行亦有程苦雨趁初歇
松風盪新嵐拂面如可接
仰首視飛鳶墮水何跼跼
據鞍心尙雄寄書氣先茶

潮平碧無岸河廣急有灘
厲揭捧我輿閉置不敢看
驚呼散鷗陣安坐慙漁竿
旣濟慰僕夫告余行路難

王恭亦有嶺客路何時平
青山待我久巖瀑爭來迎
霜縑挂翠壁正映桃花明
無人自怡悅亮非時世情

溼雲晴不歸，怒雨止還作。海上來天風，筍輿乍飄泊。蕭蕭聽篷背，兀兀趁行腳。問名愁里安，前路方岵嶮。

里安嶺

嶺雲千樹寒，嶺路一痕白。海雨飛送人，山泉下迎客。松

濤作鼓吹，巖瀑展笙帛。帝觴疑可霑，遍野皆玉液。水色

與他山異此游殊不惡，未敢厭狼藉。世人戀安居，何由選奇

僻。

茶圃

茶典剛濃，茶圃來日中亭。亭名下一徘徊，晚晴正喜聞人

懷古齋詩鈔卷二十五

三

說又被東風撥雨回

風雨度桐嶺二首

桐嶺蒼蒼勢積高，橫眠天半捲波濤。大瀛海抱三峰轉

噫氣，風催萬竅號。麥隴梯山青，疊摺筍輿衝。瘴碧週遭

雙姑怪汝操雲雨。山有雙姑宮不念行人往返勞。

松林吹霧溼，丹梯已走人間。百道溪爭怪，天紳千丈落

直飛。銀竹四山齊，晴歸海外仍宜晚。天到峰頭漸覺低

偏是前途遮望眼，杭州只在亂雲西。

初五日發梅林

陸行愁雨江愁風我避橫海來山中

由寧波渡橋下潭海口至石浦較行

寧海近百餘里橋下潭一名橫溪凡海行八十里

夜雨灌田晴送客安排兩好

煩天公灌田已足多且溢爛到瓦雞山下麥出門回首望東南苦恨濃雲蔽朝日

梅林見梅花

春事愔愔被雨催肩輿穿入菜花堆分明映出青山色
只剩梅林一樹梅

枯楊

道旁多枯楊中空外徒澤形微具杞柳高不及尋尺一

懷古田舍詩卷二十五

重

串排金鈴二月華始塲華俯而稊仰兩兩意懸隔了了
不相關同條復何益側聞我周公取物象義畫士夫與
女妻微言可紬繹後賢昧體物義取眼前釋持此詢經
師啞然笑余僻

西店口號

桃花如火萬枝紅開遍山光水影中城裏人家求一樹
朱欄玉砌護春風

柵口嶺

睡過寧台柵口關

嶺北寧波嶺南台州

不知松裏路彎環朦朧一

拭雲頭眼已見梅家丹井山

奉化道中寄懷姚梅伯孝廉變卽題其大梅山房

集

姚君前夏過我飲手持蔣侯薦士詩蔣子蕭孝廉傾囊出示

一尺稿高踣騾馱追娥曦自關鴻濛建旗鼓主此世界

非君誰眼空四海亦許我懸竿午景深相期見贈詩有午景懸竿

之一別蹉跎忽三載寄章未報慙嘔逢人問訊每譏

笑苦道箸書常忍飢近著玉樞經籥已成君知時尙逐腥腐鮓朝

朱頓當門楣吟詩作賦世不要看我自好如君癡七年

懷古詩卷之三十五

五

湖上餓不死松檟又作東西馳四明突兀蛟門奇春風

吹船滄海湄春風吹來復吹去青山滿眼誰相知念君

賣畫且沽酒閉門日對文君眉昨於賴芷泉明府座中見君姬人倚梅圖固

窮如此自可樂俯首何必爲人羈明朝扣戶踏春雨握

手莫使杯行遲醉索新詩仰天讀玉壺擊碎從渠嗤

奉化入小船初六月抵鄞縣呈朱述之明府緒曾

俯首沙河試短檣籃輿行破厭瀟瀟臥聽寶化山前雨

醒接銅盆渡口潮漲入高膝妨小麥煙開低樹出平橋

水仙庵裏高眠客肯信征人兩髯彫

初七日發鄞縣畱別朱述之姚梅伯

嶼花漸含煙島月新上弦畱人碧沚亭送客姚江船姚
江渺何處潮來復潮去君爲碧沚游濛濛柳汀曙試登
逸老堂望見天童山載酒幾時到吟詩終日閉閉人歎
寂寞行役隨漂泊銜杯憶儂時已在蓬萊閣

初八日盤大西壩過江入小西壩

破夢驚聞夜語聲裏江水退外江平濛濛大隱山前霧
吹過船窗報曉晴

清道觀

懷古會詩鈔卷二十五

五

道人終日掩柴關懶極癡雲不出山應笑江潮最辛苦
往來今古不曾閒

舟中讀姚梅伯所著玉樞經籙賦贈一首

月勝天根盡此中何須辛苦注參同博疑漢代淮南子
簡比當年河上公天上三千看積善海間九萬卽搏風
彌羅館裏如宣奏乞與金丹救五窮

泊姚江

挂席清道觀倚橈靈緒城長風八十里力與退潮爭石
匱奇書少龍山秀氣橫越材如屈指吾拜後文成

陽明書院

在龍泉山上前明浙人有兩文
成公前文成公謂誠意伯也

初九日早抵梁湖

新柳淡黃色春煙濃白時清晨自相媚夢夢無人知東
風一披拂流浪生微澌於役歎行邁閒情方在茲眷言
捨輕棹回首姚江滄

曹娥廟

逆水求屍出皇天格至誠從茲江改姓奇絕石畱名謂

匡錫類偕同里

宋上虞朱回女年十歲救祖母被刃死
明山陰諸士吉女八歲上書申父兄冤

就釘牀傷死今
皆配食廟中

明禋啟列費君看狐鼠輩愛敬有同情

懷古田舍詩鈔卷二十五

美

殿外有宋蔡卞補書碑殿東
側有明太監集李邕書碑

寒食

沃洲山影晝淒迷故林鳩向客啼風雨不歸寒食節

煙花無賴若耶溪愁邊畫舫催絃管

越俗上河皆
有絃歌畫舫

夢裏

家書報鼓鼙

南東傳聞粵中民夷交戰而余
自二月南行至今未得家書也

今日五羊

城北路楮錢麥飯幾人攜

過紹興擬攜近作就正朱瀛山太守聞其赴瀝海

所賦寄一首

蛾眉山上晚煙痕句踐城頭野色昏見說驄車巡瀝海

自憐布鼓過雷門

今謂之五雲門

觴遊已散蘭亭會琴調須傳

白塔村最是清明風雨節前途一例斷征魂

初十日早過蕭山

昨渡曹娥江暮過句踐城長風送短櫂一夜聽雨聲娟娟蕭然山破曉篷窗橫菜花照新水誤眼疑朝晴晴光幾時開水長亦以平低田有爛麥高樹無流鶯沿門見新柳觸我思歸情微聞僕夫語今日當清明

歸渡錢塘江作

不辭沿檝歷艱難又向錢江照鬢斑農事關心來去兩客程回首萬千山清明時節悲歌裏吳越人家杳靄閒百尺壯懷吾未減新詩收得海聲還

懷古田舍詩鈔卷之二十五

三

懷古田舍詩鈔卷之二十五終

